


# EIS MWE SANG MUHTAHL LUCNG ME

TOENI IN SRAMSRAMKIHN OHIYAC LUHN  
AHKOLAH IN SOM NUH KE TEMPUHL



PUK IN LUTI NUHTIN MWET LUTI

# EIS MWE SANG MUHTAHL LUCNG ME


TOENI IN SRAMSRAMKIHN OHIYAC LUHN  
AHKOLAH IN SOM NUH KE TEMPUHL

PUK IN LUTI NUHTIN MWET LUTI

© 2004 sin Intellectual Reserve, Inc.  
Kuh ac suwohs nuh kwewa fihliyucki  
Ma sihmlac se ahk luo 2003  
Sihmlac fin acn Macrke


Ahkkweyeyucklac ke English: 3/03  
Ahkkweyeyucklac ke lweng: 3/03

Lwenglah luhn *Endowed from on High: Temple Preparation Seminar*  
Kosraean



## KOANO

In ikacslah	iv
Tempuhl uh Luti ke Plwacn Luhlahp in Molwelah	1
Kuht Enenuh in Nwacswacs in Utyak nuh Lun Tempuhl	7
Orekma ke Tempuhl Use Mwe Insewowo Yohk nuh ke Moul Lasr	14
Eis Akwuck ac Olwelah ke Tempuhl	18
Eis Etwacack sin Leum ke Akucl	23
Ahkolah in Utyak nuh ke Tempuhl Muhtahl	29
Sikalweni in Engankihn Mwe Insewowo ke Som nuh Tempuhl uh	34



## IN IKACSLAH

### SRIHPAC

Mwe luti in ahkuhtweyac se inge oreklac in sang kahsrüh mēpucr ke Alu luhn Jisus Kraist luhn Mwet Luhlahlfongi Lal ke Lwen Sahflah ma ahkolah in eis pwepuh in lwelah ac in wi som nuh ke tempuhl. Mēpucr suc ma wi tari nuh ke tempuhl an kuh pac in wi in muh yohkwaclihk etuh laltahl ke tempuhl.

### MWET WI

Mwet ma wi eis kuhlāhs se inge enenuh in luhngse som nuh ke tempuhl ac nwacsnwacs in eis sie pwepuh in lwelah nuh tempuhl. Fin eltahl soenna eis sie pwepuh in lwelah, eltahl enenuh in ahkolah in eis sie.

Fin mwet ac wi an soenna wi sie kuhlāhs ke Sacnri Skul ma sram-sramkihn puk in luti ke *Muhtwacwacyacn Wosasuc* uh, ngihsreyuck, tuhsruhki tiac arlac enenweyuck, elos in wi sie kuhlāhs ke Sacnri Skul met liki eltahl wi kuhlāhs se inge. Met liki ituck kuhlāhs se inge, enenuh in oasr kahlwem na wowo se lalos ke mwe luti ke muhtwacwacyacn wosasuc ac ip yohk uh ac sie luhngse in ahkos masap luhn God, oacna ma sap luhn tiac kosro, ahkmuhtahlye lwen Sahuht, Kahs in Lahlmwetmwet ac masap luhn sie tahfuh singucul. Moul nwacsnwacs ac kampare nuh ke moul suwohswohs la sifacna pa ma enenweyuck in muh wi eisyacn akwuck ke tempuhl.

Ye kolyuck luhn pisap kuh prestuhn luhn pracns, kaunsuhl luhn ward kuh pracns kuh in sramsramkihn inkacnek in orekmakihn kuh se la tuh in sie ipin srihke lalos in ahkweye sucu ac kahsrüh mukul an in ahkolah in eis Melchizedek Pristut.

Kais sie mwet ma wi uh enenuh in suliyuck elos in wi kuhlāhs sacn sin pisap kuh prestuhn luhn pracns kuh sin sie mwet kol ke Melchizedek Pristut ke ward kuh pracns sacn.

### PACL AC ACN

Pihsen kuhlāhs nuh ke mwe luti in ahkuhtweyac se inge tiac oacna sie luhpah, tuhsruhki elos enenuh in lutiyuck ke u srihsrihk ke lacfuhl luhn ward kuh pracns. Kuhlāhs an ac kuh in lutiyuck ke nien toeni kuh ke sie lohm ah. Acn an, pacl an, ac fususiacyacn ahkuhtweyac an enenuh in wacngihn elyah kac nuhsin mwet ma wi an ac nuh sin mwet luti sacn.

Kuhfa an kihtakatwelihk nuh ke lesin itkohsr. Ohinge, mwet luti an enenuh in sislah pacl yohk in fal nuh ke pacl mempucr ke kuhlahs an enenuh nuh ke kais sie lesin. Ma se inge ac kuh in enenuh pacl yohk liki puhlan pacl ma oreklac nuh ke kais sie piriet.

### **KUHFA NUH KE KUHLAHS**

Kais sie mwet ke kuhlahs enenuh in oasr puk in ma suhmuhslah nah-tuh ke kuhlahs. Kais sie mwet enenuh pac in oasr sie puk srihsrihk ke *Ahkolah in Utyak nuh ke Tempuhl Muhtahl* (36793), suc pa ac weacng mwe rit luhn tuhlihk lutlut ke mwe luti se inge. Orekmakihnyuck yohk ke lesin kac inge, ac mempucr ke kuhlahs an enenuh in siyuc-kyuck se in riti ke wik ma mwe luti se inge ac lutiyuck uh.

### **MWET LUTI**

Kais sie mwet kuh siacnyacn kuh in kuneyucki in luti mwe luti se inge. Mwet Luti uh enenuh in yohk luhlalhfongi la ke wosasuc uh ac in fihsracsr in akihlen mokleyuck luhn Nguhn uh. Elos enenuh in mwet ma eis tari mwe sang muhtahl la ma oasr pwepuh in lwelah nuh tempuhl sasuc se la ac suc kahlwem ke yohk srihpac ac muhtahl ke ma sikyak ke tempuhl uh.

Fin kuh, mwet luti sacn enenuh in wi mwet ma wi an nuhke tempuhl ke pacl se mwet ingacn eis akwuck lalos ke tempuhl an.

### **MWE NGUHSR NUH SIN MWET LUTI**

Met liki mempucr ke Alu uh utyak nuh ke tempuhl, elos enenuh in ahkolah in nguhn. In sie ip ke ahkolah se inge, enenuh in oasr kahlwem yohk lalos ke mwe luti pwacye ma kuhpahsr nuh ke plwacn in molwelah ac orekma ke tempuhl. Oasr pacl wo nuh sum in kahsrub mwet sahyac ke ahkolah se inge, kol nuh ke som nuh ke tempuhl ke pacl se emet. Oruh in fihsracsr in akihlen mokleyuck luhn Nguhn kom in muh kuh in oruh kuhfa ke lesin an ke sie inkacnek ma wo emet nuh sin mwet ma ac wi an. Esam kahs in kahsrub luhn Leum lah Nguhn fah utohkoht nuh sum ke pruhe luhn luhlalhfongi, na fin kom tiac eis Nguhn kom fah tiac enenuh in luti. (Liye D&C 42:14).

Riti puk in luti se inge ke muhtwacwacackiacn nuh ke sahflah met liki lesin se met an kom in muh kuh in kahlwem lah kuhfa ingacn ac orek fuhkah in fal. Ahkolah lesin an in wo met liki na pacl kom in muh kahlwem ke nuhnac ac in kuh in luti in wo. Ke kom luti lesin an, oruh kom in etuh na pwacye lah mwet wi an kahlwem na pwacye ke mwe nuhnac an met liki kom tahfwelah lesin an. Nimet kom suhlahklahk in oruh lesin an. Muhtweng ac lwelah mwet ma wi an in nuhnac ke mwe luti an ac kahsrelos.

Met liki kais sie lesin ac ke oacna sie pacl ke lesin an, sang pacl nuh sin mwet ke kuhlals an in kihnsensiyuck ac sramsramkihn mwe nuhnak an. Kahsreltahl in orekmakihn mwe lutlut ma eltahl luti an ke moullalos an. Orekmakihn ma suhmuhslah, luti luhn mwet pahluh ke lwen sahflah, ac kolyuck luhn Nguhn luhn Leum in topuk kihnsensiyuck luhn mwet wi an.

Ke muhtwacwacack nuhke sahflahiyacn kuhlah se inge, esam na ohiyac muhtahl luhn akwuck ke tempuhl. Ke ahkuhtweyucki ke fahk se tohkoh inge, kuhtuh atacn orekma ke tempuhl uh tiac enenuh in sramsramkihnyuck lihkihn tempuhl:

“Kuht tiac sruhmuhn akwuck ke tempuhl lihkihn tempuhl. Tiac lwelahlut etwacack ke mukwikwi in alu ma orek ke tempuhl uh in fihliyuckyang nuh sin kuhtuh pacna suc ma ac luhngse in etuh lah mwet sahyac soenna etuh ke mukwikwi in alu inge. Pwacye pa ingacn apihset la uh. Ke kuhiyacsr kuht kwacfe mwet nuhkwea in sun ma enenuh nuhkwea ac ahkolah nuhke puhla ma ac sikyak tempuhl...”

“Akwuck ac mukwikwi in alu ke tempuhl uh fihsracsr. Elos oaskuh. Elos muhtahl. Tiac sramsramkihnyuck nuh sin mwet ma tiac ahkolah in som nuh tempuhl” (*Ahkolah in Utyak nuhke Tempuhl Muhtahl*, 2).

Orekma in sang ahkkweye luhlalfongi lom ke tempuhl, ac fahkwack nuh sin kuhlals lom an pacl nuhkwea ke pwacyeyeiacn me lutlut ma kom luti an. Oacyacpac sang pacl nuh sin mwet ke kuhlals an in fahkwack luhlalfongi lalos oacna ke enenuh an.

Esam pacl nuhkwea yohk srihpaciyacn orekma ke tempuhl uh. Elder Boyd K. Packer el fahk: “Akwuck ac wuhlweacng pa ahkwacyei nwacsnwacs lalos in ilyak nuh Yohrohl uh. In fal in eisaclos pa finsrak ke sie moull; in karuhnganuhlos tukun eisaclos pa elyah luhn moull se inge” (ke Conference Report, Apr. 1987, 27; kuh *Ensign*, May 1987, 24).



---

## TEMPUHL UH LUTI KE PLWACN LUHLAHP IN MOLWELAH

*“Ac pa inge moul  
ma pahtpaht, tuh  
elos fah etwekom  
God pwacye sefan-  
na, ac Jisus Kraist,  
suc kom suhpwac-  
ma” (Jon 17:3).*

### SRIHPAC

In kahsrüh mwet ke kuhläh an in kahlwem lah plwacn in molwelah lutiuyck ke tempuhl.

### AHKOLAH

1. Met liki muhtwacwacack kuhläh an, ahkollah sie mwe ahkkahlwe-  
mye soenna sahflah an ke port an kuh ke sie petsac ma soenna  
sahflah an ke plwacn in molwelah (liye sra puk 3). (Sahp komac  
luhngse oraclah sie kain sroal sacn pac ma soenna sahflah ke sie  
ipin pwepuh an luhn kais sie mempucr ke kuhläh in ahksahfyelah  
pacl sramsram ke kuhläh an orek uh.)
2. Liye kais sie mempucr ke kuhläh in oasr puk in ma suhmuhslah  
nahtuh. Oacyacpac sang sie puk srihsrihk ke *Ahkollah in Utyak nuh  
ke Tempuhl Muhtahl* nuhtin kais sie mempucr ke kuhläh. Ma inge  
enenuh in ohtoh tari in ip ke kuhfa luhn kuhläh an.
3. Kom kuh in srihsrngiyac kuhtuh mempucr ke kuhläh an in kahsre  
kom ke sacksin ahkluo ke lesin sacn. Kom kuh in sang ma suh-  
muhslah ma ahkkahlwemyeyuck ye kais sie ip ke plwacn in mo-  
lwelah an (moul met liki isuslac, puhtatlac sac, kain inge) nuh sin  
sie mempucr ke kuhläh an ac siyuck sel in tuhkuh nuh ke kuhläh  
ac ahkollah in sruhmuhn in fototo lah meac ma suhmuhslah inge  
luti ke plwacn in molwelah uh.
4. Fin kahset ke *Phase 1 Video (5X779)* oasr, sah p kom ac luhngse  
sang in liyeyuck “Mwet Suk Engan,” mihnit 13 lusac.

### LUTYACN LESIN

#### TEMPUHL UH PA SIE ACN IN LUTLUT KE MA LUHN NGUHN

Suli sie mwet an in ikacslah ke pruhe.

Ahkuhtweyac lah ma suhmuhslah uh ac orekmakihnyuck ke kais sie  
lesin. Kwacfe mempucr ke kuhläh in us ma suhmuhslah an nuh ke  
kais sie kuhläh.

Kihtaclihk puk ke *Ahkollah in Utyak nuh ke Tempuhl Muhtahl* nuh sin  
kais sie mempucr ke kuhläh. Ahkuhtweyac lah pa ingacn kuhfa luhn  
tuhlihklutlut an nuh ke kuhläh an. Kuhfa ke puk srihsrihk se inge



ac sramsramkihnyuck ke lesin ingacn, ac kais sie mempucr ke kuhlahs enenuh in riti puk srihsrihk se inge ke wik ma mwe lutlut se inge ac lutiyuck uh.

Ikacslah lesin an in ahkuhtweyac lah tempuhl uh pa sie acn in lutlut ke ma luhn nguhn ma kahsre kuht in luti yohk ke srihpac luhn moul ac plwacn in molwelah.

Sap mempucr ke kuhlahs in riti fahk tahklac inge, suc ahkuhtweyac kuhtuh sin ma ma kuht luti ke tempuhl:

Prestuhn Gordon B. Hinckley el fahk lah tempuhl uh “eklac nuh ke sie acn in lutlut in ahkuhtweyac ke ma na wowo ac muhtahl luhn God. Inge kuht tahkuhnlah plwacn luhn sie Pahpah in ahkolah tuhlihk mukul ac tuhlihk muhtwacn nahtuhl an ke fihl nuh kwewa. Inge kuht fihliac atac fototo se ye muhtahsr ke fuhfahsryucsr netok ma pahtpaht luhn mwet uh liki moul lasr yurin God fahlac ke moul se inge nuh ke moul se tok uh. Muhtwacwacyacn mwe luti ac ma pwacye uh lutiyuck arulacna kahlwem ac fihsracs fal nuh ke kahlwem lalos nuh kwewa ma lohng uh” (“The Salt Lake Temple,” *Ensign*, Mar. 1993, 5–6).

Prestuhn Brigham Young el luti lah akwuck se ke tempuhl ma pahngpahng mwe sang muhtahl uh use nuh sesr ahkuhtweyac ma fal nuh ke moul ma pahtpaht: “Mwe sang muhtahl lom pa, in eis akwuck inge ke lohm sin Leum, suc enenweyuck nuh sum, tukun kom fahsr liki moul se inge, in lwelah nuh sum in fohlohk nuh yohrohl Pahpah Lucng” (*Discourses of Brigham Young*, sel. John A. Widtsoe [1954], 416).

Sap mempucr ke kuhlahs in riti Jon 17:3.

- Meac ma suhmuhslah se inge luti ke etwacack yohk srihpac se emet ma kuht kuh in eis uh?

Ahkuhtweyac lah lun tempuhl, kuht lutlut yohk kac Pahpah Lucng ac Jisus Kraist, ac kuht kuh in ahkkweye kuhpahsr lasr nuh Selos. Kuht lutlut ke plwacn Lalos nuh sesr, suc pa sramsramkihnyuck ke ma suhmuhslah ke kain in sifac, oacna plwacn luhn iwacalah kuh plwacn in molwelah.

- Meac kahsre kom in luti ke plwacn in molwelah ne ingena ke moul lom an?

- Kahlwem lom ke plwacn in molwelah ahkinsewowoye moul lom an fuhkah?


#### KE TEMPUHL LUTYUCK KUHT KE PLWACN IN MOLWELAH

Ahkuhtweyac lah in ipin mwe sang muhtahl ke tempuhl uh, lutiyuck plwacn in molwelah. Ip se inge ke lesin an fah kahrh mwet ke kuhlahs an in kahlwem ke luti ke tempuhl inge.

*Kuht ac ahkwacyei  
ke ma se inge, in  
liye fin elos ac oruh  
ma nuh kwewa  
Leum God lalos fah  
sapkihn nuh selos  
(liye Abraham 3:25).*

Fohlohklac neke sroal se ma soenna sahflah ke port an, ac sifil liye ma in etweyuck tahklac inge, orekmakihn ma suhmuhslah in kah-sruh mwet ke kuhlans an in kahlwem ke mwe nuhnak inge. Ke sram-sramkihnyuck ma suhmuhslah an, suhmuhslah ke lain ma fal ke sroal an (liye sroal se ma sahflah ke sra puk 6). Fin mwet ke kuhlans an oasr sroal se ingacn nahtuh, sap eltahl in sang fuhs in kahrhuh an nuh ke sroal se nahtuhltahl an.

Fin kom kuneyac mempucr ke kuhlans in kahrre kom, siyuck eltahl in fahk ma eltahl etuh ke plwacn in molwelah. Ahkuhtweyac lah mwe sramsram se inge fah sramsram yohk na ke kihsensiyuck ten inge: Kuht muhta yac tuhkuh? Meac srihpac lasr fin facluh uh? Kuht ac som nuh oyac tukun moul se inge?



***Moul met liki Isuslac***

1. Kuht pa tuhlihk nguhn nuhtin God, Pahpah tuhmasr Inkuhsrao, ac kuht muhta Yohrohl met liki kuht tuhkuh nuh facluh (liye Mwet Rom 8:16–17).
2. Pahpah Lucng el pahngon sie tuhkweni luhlahp inkuhsrao (liye Abraham 3:22–23). El ahkkahlwemye sie plwacn nuh ke kapkapwack ac engan ma pahtpaht, suc pa pahngpahng plwacn in molwelah. Kuht sulaclah in ukwe plwacn Lal.
3. In fal nuh ke plwacn se inge, Jisus Kraist, wen se emet nuhtin Pahpah Lucng, sifacna siyuck in el pa mwet Lahngo lasr (liye Moses 4:2; Abraham 3:27).
4. Lucifer, sie pac wen nuhtin God, lain plwacn lal Pahpah Lucng ac “suk in kuhnaoslah sukohsohk in sulaclah luhn mwet uh.” El ac mwet fahsr tohkohl sisilac liki inkuhsrao ac lahfuhkihn pacl wo in eis sie mahno ac puhlakihn moul suhkawihl. Ke sramsram mahtuh luhn facluh, Setuhn suc pa Lucifer el pahngpahng ingena angwe srihke in oruh mwet nuh kwewa in ahsor oacna el in srihfaclos in orekma koluk (liye Moses 4:1,3–4; 2 Nephi 2:17–18).

***Puhtatlac Sac***

1. Adam ac Eve sollac in pa tuhkuh nuh facluh emet ke tuhlihk nuhtin Pahpah Lucng ac fihliyucki ke Imac Eden. Ke pacl sac, mahno-los soena suhkawihl (liye Moses 3:7–8, 21–23).
2. Adam ac Eve sulaclah in kang fahko ke sahk soko ma God el srunga elos in mongo kac ah. Ma sikyak pa, elos fahsrelihki liki God. Fahsrelihki se inge pa pahngpahng misac luhn nguhn. Eltahl muhtwacwacack in suhkawihl, suc kalmac pa mahno lalos ac fah misac. Oacyacpac elos kuh in oraclah tuhlihk nahtuhlos. Eklac nuh ke ohiyac suhkawihl pa pahngpahng Puhtatlac (liye 2 Nephi 2:19–25; D&C 29:40–41).

***Moul Suhkawihl***

1. Elos nuh kwewa suc sulaclah ke moul met liki isuslac ah in fahsr tukun plwacn lal Pahpah Lucng eis sie mahno in isuslac nuh facluh. Ke moul suhkawihl lasr, kuht srihkeyuck in liye lah kuht ac luhngse orekmakihn luhlalhfongi in kol moul lasr uh kuh tiac ac lah kuht ac ahkos masap lal Pahpah Lucng ke kuht wacngihn yohrohl uh kuh tiac (liye Alma 34:32; Abraham 3:24–26).
2. Ke moul suhkawihl, kais sie mwet kuh in sifacna sulaclah lah el ac fahsr tukun God kuh fahsr tohkohl Setuhn (liye 2 Nephi 2:27).

***Misac ac Sifilpac Moulyak***

1. Ke kuht misac, nguhnasr ilyak nuh ke facluh luhn nguhn, ac mahnosr muhtana facluh. Puhlan pacl in fahsrelihki se luhn mahno ac nguhn inge tuhtahflah na neke pacl in moulyak lasr uh. Nguhnin mwet suwohswohs utuck nuh ke acn mislac ac engan se, suc pahngpahng pacruhtais. Nguhnin mwet koluk fihliyucki ke acn lohsr mahtoltol, suc kuhtuh pacl uh luhmweyuck nuh ke sie nien kaclpous (liye Alma 40:9–14; liye pac 1 Peter 3:19).
2. Iwacalah ac Sifil Moulyak luhn Jisus Kraist use inkacnek nuh sin mwet nuh kwewa in kuhtanglah misac luhn mahno ke sifil moulyak. Moulyak kalmac pa nguhnasr ac mahno suwohswohs lasr ac sifil fohlohkweni nuh ke moul ma pahtpaht (liye 1 Mwet Korint 15:22; 2 Nephi 9:10–13; Alma 11: 42–44).
3. Iwacalah luhn Jisus Kraist oacyacpac use inkacnek nuh sesr in eis nuhnakmuhnahs ac nwacsnwacslah liki ma koluk kuht in muh kuh in fohlohk muhta yurin God. Mwet Lahngo el kweok ke ma koluk luhn mwet uh ke Imac Gethsemane ac fin sahsxing soko. Ke srihpen Iwacalah Lal, kuht kuh in auliak ke ma koluk lasr ac eis nuhnak muhnahs. Ke kuht moulkihn wosasuc uh, kuht kuh in fal in wi eis mwe sang luhn moul ma pahtpaht ac eklac oacna El (liye Mosiah 3:5–12).

*“Kuht luhlalhfongi lah ke iwacalah luhn Kraist, mwet nuh kwewa fah moul-lac, ke ahkos masap ac akwuck nuh kwewa ke wosasuc” (Ip Yohk ke Luhlalhfongi 1:3).*

***Wolacna luhn Tohkohsrahi***

Ke pacl in sifil moulyak, kais sie mwet fah srihsrngiyucki nuh ke Wolacna luhn tohkohsrahi la. Elos suc ma suwohswohs fah usruu engan luhlahp a mwe in sewowo liki na elos suc ma tiac ahkos masap luhn God (liye 1 Mwet Korint 15:35, 40–42).

1. Wolacna luhn telestial ma nuh selos suc ma tiac wi eis wosasuc luhn Jisus Kraist kuh luhlahlfongi ke Jisus kuh mwet pahluh luhn God, ac suc moukihn moul koluk (liye D&C 76:81–88, 98–103).
2. Wolacna luhn terestrial el ma nuh sin mwet facluh suc kiapweyucklac sel Setuhn ac nuh selos suc ma tiac fokoko ke luhlahlfongi kacl Jisus Kraist (liye D&C 76:71–79).
3. Wolacna luhn celestial sriyucklac nuh selos suc ahkos masap ac eis akwuck, kuhtanglah ma nuh kwewa ke luhlahlfongi ke Jisus Kraist, ac eklac nwacsnwacs insiac (liye D&C 76:50–70).

Siyuck mempucr ke kuhlahs an in topuk kihsensiyuck ten inge:

- Meac kom lotwelah ke plwacn in molwelah ma kom tiac etuh met?
- Fuhkah puhla lom ke kom nuhnkuh ke ip kunacl Jisus Kraist ke plwacn na yohk se inge uh?
- Kuht ac ahkkahlwemye fuhkah nuh sin Pahpah Lucng ac Jisus Kraist lah kuht engan ke plwacn se lalos inge?


In ahkkahlwemye yohk srihpac ke Iwacalah luhn Mwet Lahngo ke plwacn in molwelah, suhmuhslah ip yohk ke luhlahlfongi ahktolu ye sroal se ma sahflah oacna ke ahkkahlwemyeyuck an.

**SAHFLAH**

Ahkkahlwemye lah tempuhl uh use nuh sesr etwacack ke plwacn se inge, etwacack ma use mwe in sewowo na yohk nuh ke moul lasr. Fahk luhlahlfongi lom ke mwe in sewowo ma kom eis ke srihpen kom kahlwem ke plwacn in molwelah ac moukihn mwe luti yohk ke wosasuc.

Sahp kom ac luhngse ahksahfye ke petsac se ke “Mwet Suk Engan.”

Suli sie mwet an in kaliyac ke pruhe.



*“Kuht luhlahlfongi lah ke iwaclah luhn Kraist, mwet nuh kwewa fah moul, ke ahkos nuh ke masap ac akwuc nuh kwewa ke Wosacuc” (Ip Yohk ke Luhlahlfongi 1:3).*



## KUHT ENENUH IN NWACSNWACS IN UTYAK NUH LUN TEMPUHL

*“Ac tuhfeh pa kena  
se ma loal emet  
luhn insiyuck in  
liye mempucr nuh  
kwewa ke Alu uh in  
nwacsnwacs in som  
nuh ke tempuhl.  
Nga finsrak mem-  
pucr mahtuh nuh  
kwewa in fah  
nwacsnwacs in—ac  
us—sie pwepuh in  
lwelah nuh tem-  
puhl sasuc la”  
(Prestuhn Howard  
W. Hunter).*

### SRIHPAC

In kahsrüh mempucr ke kuhlachs an in kahlwem kac lah eltahl enenuh in nwacsnwacs in utyak nuh ke tempuhl.

### AHKOLAH

1. Wo in orek met liki lesin se inge, suli pisap kuh prestuhn luhn pracns in sruhmuhn ma in etweyuck ke inkacnek in eis sie pwepuh in lwelah nuh tempuhl. Kuhfa ma motkoeyuck nuh kac an oasr ke sra puk 11–13 ke ip se ke “Inkacnek in Eis Pwepuh in Lwelah nuh Tempuhl Pa Sie Mwe Insewowo.” Fin pisap el wacngihn, kom kuh in ngihstre sie mwet kahsrüh lal an in oruh.
2. Suhmuhsrah fahk tahklac inge ke port an kuh ke sie pwepuh an: “Nga suli mempucr nuh kwewa ke Alu uh in moulkihn lohacng yohk nuh ke moul ac srihkasrak luhn Leum Jisus Kraist” (Prestuhn Howard W. Hunter, ke Conference Report, Oct. 1994, 7; kuh *Ensign*, Nov. 1994, 8).

### LUTIYACN LESIN

Suli sie mwet an in ikacslah ke pruhe.

Siyuck sin mwet ke kuhlachs an lah oacna oasr kuhtwena kihsensiyuck lalos. Orekmakihn pacl fal in topuk kihsensiyuck an ke kuhiyom kwewa ac ke kolyuck sin Nguhn luhn Leum. Esam lah kuhtuh ohiyac ma orek ke tempuhl uh tiac enenuh in sramsramkihnyuck lihkihnh tempuhl.

Ahkkahlwemye lah elos suc utyak nuh ke tempuhl enenuh in ahkkahlwemye luhlalhfongi lalos ke Pahpah Lucng ac Jisus Kraist in moulkihn wosasuc ac karuhnganwacng masap. Elos enenuh in nwacsnwacs ke ohiyac, moli ‘sie tahfuh singucul, ahkos Kahs in Lahlmwetmwet, ahkmuhtahlye lwen Sahpuht, ac srihke in moul suwohswohs ke inkacnek nuh kwewa sahyac. Elos enenuh in sirapeiyuck sin pisap kuh prestuhn luhn pracns kuh prestuhn luhn stek kuh misin ac konweyuckyak muh nwacsnwacs in eis sie pwepuh in lwelah nuh tempuhl. Lesin se inge ac sifil sramsramkihnh kuhtuh mwe luti yohk ke wosasuc ac masap ma mwet ke kuhlachs se enenuh in moulkihn elos in muh nwacsnwacs in wi nuh ke tempuhl.

### MOUL NWACSNWACS

Ahkuhtweyac lah Leum ac mwet pahluh Lal uh kalweni in luti yohk srihpac luhn ohiyac nwacsnwacs uh. Prestuhn Gordon B. Hinckley el luti: “Kuht luhlalhfongi ke tiac kosro met liki pahyuck ac luhlalhfongi na pwacye tukun pahyuck. Pa inge kwewa. Pa ingacn inkacnek nuh ke engan ke moul. Pa ingacn inkacnek nuh ke ma fal. Use mislac nuh ke insiac uh ac mislac nuh lohm ah” (ke Conference Report, Oct. 1996, 68; kuh *Ensign*, Nov. 1996, 49).

Tuhkweni riti ma suhmuhslah tahklac inge:

Doctrine and Covenants 42:22–24 (Leum el sapkihn nuh sesr in luhngse mukul kuh muhtwacn kiyacsr ac in tiac fung nuh sin kuh-twena mwet sahyac; El sapkihn nuh sesr in tiac kosro.)

Doctrine and Covenants 121:45 (Leum el sapkihn nuh sesr in “Iwe-lah nwacsnwacs uh in tiac tui in nahwuh nuhnak lasr uh.”)

1 Timote 4:12 (Kuht in mwe srihkasrak luhn nwacsnwacs uh.)

1 Nephi 10:21 (Wacngihn ma fohkfohk kuh in muhta yurin God.)

Ip Yohk ke Luhlalhfongi 1:13 (Kuht luhlalhfongi ke moul nwacsnwacs ac fihlpacp.)

- Efuh Leum el sramsramkihn yohk nwacsnwacs ke akihlenyacn ma wo liki ma koluk uh?
- Meac kuhtuh ma sikyak ke ohiyac sesuwohs ma kuht kuh in liye ke facluh se ma raunikuhtlac uh? Meac kuhtuh mwe in sewowo ke moulkihnyaen sie moul wo ac nwacsnwacs uh?

Fahk nuh sin mwet ma wi kuhlahs an in liye tahk se kom suhmuhslah an ke port kuh pwepuh sacn (liye ip se ke “Ahkolah” ke lesin se inge).

- Kahs in kahsrub se inge ac kahsre kuht ac tuhlihk nahtuhsr uh fuhkah in lain mwe sruhf luhn facluh ac moulkihn moul nwacsnwacs uh?

### SIE TAHFUH SINGUCUL

Siyuck mempucr ke kuhlahs an in riti Doctrine and Covenants 119:4.

Ahkkahlwemye lah Prestuhnsi Se Met use ahkuhtweyac tahklac inge ke pwacyeiacn oruh nuh ke sie tahfuh singucul uh: “Tahk se ma fih-sracsr emet ma kuht etuh uh pa fahk luhn Leum sifacna, ahkkahlwemye lah mempucr ke Alu uh enenuh in moli ‘sie tahfuh singucul ke mani nuh kwewa laltahl ke yac nuh kwewa,’ suc kahlwem muh pa ma utyak” (Lacta se sin Prestuhnsi Se Met, 19 Mar. 1970). Mani ma orekweni ke sie tahfuh singucul uh orekmakihnyuck in sang muhsahi lohm in toeni, tempuhl, in oruh orekma luhn misineri, ac in sang muhsahi tohkohsrahi luhn God fin facluh.

Akacsruhi fahk se lal Prestuhn James E. Faust inge:

“Sie tahfuh singucul el sie mwe luti yohk suc yohk srihpac nuh ke engan ac kapkapwack wowo luhn mempucr ke Alu uh sifacna yen nuh kwewa, kwewana mwet kahsruhp ac mwet suhkahsruhp. Sie tahfuh singucul el sie mwe luti yohk luhn kihsackuhnlah ac ki se nuh ke ikacslah luhn winto inkuhsrao.... Mempucr ke Alu uh ma tiac ahkfalye sie tahfuh singucul uh tiac srolah liki Alu uh; elos tilac eis mwe insewowo muhkwenah” (ke Conference Report, Oct. 1998, 73–74; kuh *Ensign*, Nov. 1998, 58–59).

Sifilpac liye wi mempucr ke kuhlahs an ma suhmuhslah tahklac inge: Leviticus 27:30 (Sie tahfuh singucul ma luhn Leum; muhtahl nuh sin Leum.)

Malakai 3:8–11 (Kuht pihsracl God ke kuht tiac oruh sie tahfuh singucul lasr uh; God el ac fah arulacna ahkinsewowoye elos suc ahkfalye sie tahfuh singucul uh.)

- Mwe insewowo fuhkah kom eis ke srihpen kom ahkfalye sie tahfuh singucul uh?
- Efuh kuh kuht pihsre God pacl kuht tiac oruh sie tahfuh singucul lasr uh? (Liye D&C 104:14.)

Ahkuhtweyac lah kais sie yac mempucr uh siyuckyuck se in ohsun nuh sin prestuhn luhn pracns in ahksuwohsye sie tahfuh singucul ac fahk nuh sel lah oacna el ahkfalye wo sie tahfuh singucul lal. Miting se inge pa pacl wo nuh sin mempucr in konwacack lah fuhkah ahkfalyeyacn masap yohk srihpac se inge seltahl

#### **KAHS IN LAHLMWETMWET**

Ahkuhtweyac lah met liki kuht ac utyak nuh ke tempuhl, Leum el finsrak in wacngihn ohiyac koluk ma ac ahkfohkfohkye moul lasr ac tiac fokoko, kwewana ke nguhn ac ke mahno.

Riti ip kuh kwewana ma suhmuhslah ten inge:

1 Mwet Korint 3:16–17 (Mahnosr pa tempuhl luhn God ac tiac enenuh in ahkfohkfohkyeyuck.)

Doctrine and Covenants 89 (Fwackyuck se inge pa etweyuck muh Kaks in Lahlmwetmwet. Fuhs 1–9 sramsramkihn ma kuht tiac enenuh in eis nuh in mahnosr; fuhs 10–17 sramsramkihn ma wo nuh ke mahnosr; fuhs 18–21 ahkuhtweyac ke olwelah luhn Leum nuh selos suc karuhnganwacng masap Lal.)

- Meac ma fin facluh mihsenge ma oruh kuht in kuhnaoslah masap ma utuckuh nuh sesr ke Kaks in Lahlmwetmwet uh?



- Kuht ac kaksrekuht sifacna ac tuhlihk nahtuhsr uh fuhkah in karihngihn kaks in lahlmwetmwet?

Siyuck mempucr ke kuhlaks in riti Doctrine and Covenants 29:34.

- Inkacnek fuhkah kom nuhnkuh muh ahkostwen nuh ke Kaks in Lahlmwetmwet uh kuh in ahkinsewowoye kuht ke nguhn oacpacna nuhke mahno uh?
- Meac kuhtuh “mwe kaksruhpuh luhn etwacack” (D&C 89:19) kuht ac kuh in eis ke karihngihnyacn masap inge?

Akacsruhi fahk lal Prestuhn Boyd K. Packer inge:

“Ma kom luti in nguhn uh wiwina, nuh ke luhpah se, oruh lom nuh ke monum an. Ma se inge pa oruh Kaks in Lahlmwetmwet uh yohk srihpac.

“Ma ac oraclah ohiyac uh sensenkihiyuck ke fwackyuck sacn—ti, kohfi, mwe sruhi, paip—kosreyuck ke puhla na muhlahlah ke sram-sram in nguhn, oacna kuhtuh mwe sruhi fokoko sahyac ac oruh uh.

“Nimet pihlesruh Kaks in Lahlmwetmwet, ke ma sacn ac fah utuc-koht nuh sum mwe kaksruhpuh yohk luhn etwacack, finne mwe kaksruhpuh ma wihklac ma wihliyuckyang nuh selos suc karuhnganwacng. Ac kuh in mahno pa sie mwe insewowo ma weacng an” (ke Conference Report, Oct. 1994, 78; kuh *Ensign*, Nov. 1994, 61).

#### LWEN SAHPUHT

Tuhkweni riti Exodus 20:8–11.

Ahkuhtweyac lah mwet luhn Leum sapkihiyuck pacl nuh kwewa in karuhnganwacng lwen Sahpuht in muhtahl. Leum el olwelah mwe insewowo yohk nuh selos ma oruh ohinge.

Siyuck mempucr ke kuhlaks in riti Doctrine and Covenants 59:9–13.

- Meac srihpac yohk ma utuckuh sin Leum in liyacacng lwen Sahpuht in muhtahl?
- Inkacnek fuhkah ke Doctrine and Covenants 59:9–13 ahkuhtweyac ma kuh in kol karuhnganwacng lasr ke lwen Sahpuht uh?
- Meac kuhtuh mwe insewowo wihliyuck nuh selos suc liyacacng lwen Sahpuht uh?

In sie ip ke mwe sramsram se inge, akacsruhi ke ip yohk inge, luti-yuck sel Elder James E. Faust:

“Efuh God el siyuck sesr in ahkfuhiwactye lwen Sahpuht? Srihpac nga nuhnkuh kac uh pa ma ke ip tolu. Ma se met an pa, enenuh luhn mahno in monglac ac ahksasuc....

“Srihpac ahkluo pa, ke nuhnak lasr, ke sie kahlwem na yohk. Ma ke sifil isuslac a ahkfokokoyeyacn nguhnasr...

“Srihpac ahk tolu sahp pa yohk srihpac emet ke ma tolu ac. Ma ke ahkostwen nuh ke masap oacna sie ma sang ahkkahlwemye luhngse lasr nuh sin God. Insewowo elos suc tiac enenuh kuhtwena srihpac liki na luhngse lalos nuh sin Mwet Lahngo in karuhnganwacng masap lal” (ke Conference Report, Oct. 1991, 46–47; kuh *Ensign*, Nov. 1991, 35).

- Meac kuhtuh mwe insewowo ma tuhkuh nuh ke moul lom ke srihpac kom karuhnganwacng lwen Sahpuht?

Siyuck sin mempucr ke kuhlahs in olwelah nuh selos sifacna in moulkihn masap ma sramsramkihnyuck mihsenge uh: ohiyac luhn moul nwacsnwacs, sie tahfuh singucul, Kahs in Lahlmwetmwet, ac liyacacng lwen Sahpuht uh. Na elos fah arlac ahkolah in wi nuh tempuhl ac fah eis mwe insewowo yohk sin Leum.

#### INKACNEK IN EIS PWEPUH IN LWELAH NUH TEMPUHL PA SIE MWE INSEWOWO

Ahkuhtweyac lah met liki mempucr kuh in som nuh ke tempuhl, kais sie selos enenuh in konweyuckyak muh nwacsnwacs in eis sie pwepuh in lwelah nuh tempuhl. Oacna ke ahkuhtweyucki ke fahk se ten inge, inkacnek in eis pwepuh in lwelah se inge kuh in ahkinsewowe ye moul luhn kais sie:

“Kunohkohn luhn pisap pa in kihsensiyuck ke nwacsnwacs lasr kais sie sifacna. Sirapei se inge ma na yohk srihpac se nuh sum ekihn sie mempucr ke Alu uh, tuh sie pacl in konwacack pactuhn luhn moul lom an yurin sie mwet kuhlwacnsap akmuhsralah luhn Leum. Fin oasr kuhtwena ma tahfonglac ke moul lom an, pisap lom an ac kuh in kahsre kom ahkfwelyelah. Ke ohiyac se inge, ke kom eis kahsruh sin mwet nuhnukuh luhn Israel, kom kuh in fahk kuh kahsreyuck in akiyac nwacsnwacs lom in utyak nuh ke tempuhl ke lwelah luhn Leum” (*Preparing to Enter the Holy Tempuhl*, 3).

Ahkuhtweyac lah pisap kuh prestuhn luhn pracns ac prestuhn luhn misin kuh stek sirapei mempucr nuh kwewa ma suk in eis pwepuh in lwelah la nuh tempuhl ke pacl se met ac elos suc ma ahko-o in macruht lun tempuhl. Mwet kahsruh ke u luhn pisap ac prestuhn luhn stek ac sirapei elos suc ma luhngse in ahksasucye pwepuh in lwelah lalos nuh in tempuhl an.

Ke pacl se inge, sang nuh sin pisap kuh prestuhn luhn pracns kuh sie sin mwet kahsruh ke u luhn pisap in sramsram ke pwepuh in lwelah nuh tempuhl. El tiac enenuh in riti oacna ke sihmlac ke kihsensiyuck in sirapei an, tuhsruh el kuh in fahk mwe nuhnak ke ma mwet ke

*“Nga ... suli mempucr ke Alu uh in fihliyac muh tempuhl luhn Leum in pa mwe akucl yohk se ke welah lalos ac akiyac na fokoko nuh ke olweacng muhtahl lalos uh” (Prestuhn Howard W. Hunter).*

kuhlahs an kuh in etuh muh pa ac siyuckyuck ke sirapei nuh ke eisyacn sie pwepuh in lwelah nuh tempuhl. Fahk inge kuh in orekma-kihnyuck in sie mwe kol:

Mempucr ma suk in eis pwepuh in lwelah la nuh tempuhl enenuh in oasr luhlalhfongi la sin Pahpah Lucng, Leum Jisus Kraist, ac Nguhn Muhtahl. Eltahl enenuh in insese in sulaclah mwet pahluh luhn Leum, General Authority sahyac, ac mwet kol ke Alu lalos. Eltahl tiac enenuh in pahko muhta kuh asruoki nuh sin u kuh kais sie suc ma puhtatlac liki Alu uh, kuh suc luti kuh orekma lain wosasuc uh.

Elos ma suk in eis pwepuh in lwelah la nuh tempuhl enenuh in wi fahsri toeni ke kuhfa luhn Leum, toeni luhn pristut ac toeni sahyac luhn Alu uh. Eltahl enenuh in ahkfahsrye ahkwoye kunohkohn lalos ma ituckyang ke wal luhn pristut uh. Eltahl enenuh in kampare in karihngihn masap nuh kwewa luhn Leum, wi ahkfalyeyacn sie tah-fuh singucul pacl nuh kwewa, in suwohs ke kahs ac orekma, ac tiac eis ti, kohfi, mwe nihm sruhi, paip, ac kuhtuh pac ma fokoko sahyac.

Eltahl enenuh in moulkihn moul wo ac nwacsnwacs ac enenuh in ahkos masap luhn tiac kosro, suc tulokihn kuhpahsr nuh ke ohsun luhn mahno nuh sin mwet sahyac sahyacn mukul kuh muhtwacn ma eltahl pahyuck nuh se ye masap. Eltahl enenuh in moul fal nuh-ke ip yohk ke wosasuc kwewana in nguhn ac ikoac ke sie sin sie lalos nuh sin mwet in sucu lalos. Eltahl tiac enenuh in wi oasr ke kuhtwena ohiyac in ahkkweok luhn mwet sahyac ke nguhn, ikoac, kuh ke mukwikwi.

Eltahl enenuh in insese in taltal koluk ke ma koluk lalos ac tui tiac sifil oruh. Ma koluk upac, suc oacna tahfonglac luhn moul fohkfohk, ahkkweokye mwet in sucu, asruoki nuh sin u ma puhtatlac liki Alu uh, kuhnahoslah yohk ke masap luhn acn, enenuh in tuhlweyuck nuh sin pisap kuh prestuhn luhn pracns met liki na sirapei nuh ke eisyacn pwepuh in lwelah nuh tempuhl. Fin puhla pwacye luhn sie mwet in oruh wo, suc pa kahlwem luhn Kraist ituckyang nuh sin mwet nuh kwewa, oruh sie mwet in ahlohloh ke ma ma enenuh in sramsramkihnyuck nuh sin pisap kuh prestuhn luhn pracns, sahp enenuh na in sramsramkihnyuck.

Elos suc ma sahf uh enenuh in oasr sisek yurin pisap kuh prestuhn luhn pracns ac prestuhn luhn stek kuh misin met liki elos eis sie pwepuh in lwelah nuh tempuhl. Eltahl enenuh in mukwikwi fal nuh ke insese sin nuhnuhkuh ma orek nuh ke fahsrelih sakn, wikuhnwacng lwen kuh pacl ma oreklac nuh ke ahkfalyeyacn tohflah luhn sucu sacn ke kais sie mahlwem.

Mwet ma suk in eis pwepuh in lwelah la nuh ke tempuhl enenuh in sirapeiyuck sin sie mwet ke u luhn prestuhn ke stek kuh prestuhn ke misin tukun sirapeiyuck el sin sie mwet ke u luhn pisap kuh prestuhn luhn pracns. Kuhtuh ac ke etuh lah efuh enenweyuck. Ke kuht suk in eis sie pwepuh in lwelah nuh tempuhl, kuht suk in eis lwelah sin Leum in utyak nuh in tempuhl. Utuckuh pacl wo nuh sesr in ahkwacyei moul nwacsnwacs lasr ye muhtuhn mwet loh luo suc pa mwet kuhlwasnsap luo luhn Leum ma oasr wal in sang lwelah yohroh. Ma se inge mwe insewowo se nuh sesr in sramsram suwohs ye muhtuhn Leum ke kuhlwasnsap nwacsnwacs lasr in utyak nuh ke tempuhl muhtahl.

#### SAHFLAH

In ahkkahlwemye yohk srihpacyacn nwacsnwacs in utyak nuh lun tempuhl ac in us sie pwepuh in lwelah sasuc, sifil sramsramkihn fahk ma orek sel Prestuhn Howard W. Hunter:

“Nga ... suli mempucr ke Alu uh in akiyac muh tempuhl luhn Leum in pa akucl yohk se ke wi lalos ac akwuck utuftuf nuh ke olwelah muhtahl lalos. Ac pa kena yohk se emet luhn insiyuck tuh mempucr nuh kwewa ke Alu uh in fal in utyak nuh in tempuhl. Nga ac finsra-kihn tuh mempucr mahtuh nuh kwewa ac fal—ac oasr la—sie pwepuh in lwelah sasuc nuh ke tempuhl, finne apkuhran nuh ke tempuhl uh tiac lwelah pacl in orekmakihnyuck” (itucklac ke Jay M. Todd, “President Howard W. Hunter,” *Ensign*, July. 1994, 5).

Fahkwack luhlhlafongi ke mwe insewowo ma tuhkuh nuh ke moul lom ke kom moul nwacsnwacs in utyak nuh ke tempuhl uh.

Suli sie mwet an in kaliyac ke pruhe.



## OREKMA KE TEMPUHL USE MWE INSEWOWO YOHK NUH KE MOUL LASR

*Ac kuht siyuck  
sum, Pahpah  
Muhtahl, tuh mwet  
kuhlwacnsap lom  
in kuh in illac liki  
lohm se inge nuklac  
ke kuh lom, ac  
tuh em fah kuh in  
an faclos, ac tuh  
wolacna lom in  
fah apuhnuhloslac  
(liye D&C 109:22).*

### SRIHPAC

In kahsrüh mwet ke kuhlals in kahlwem kac lah elos ma nwacsnwacs utyak nuh ke tempuhl uh fah eis mwe insewowo yohk sin God.

### AHKOLAH

1. Sifilpac lohacng nuh ke ma suhmuhslah orekmakihnyuck ke lesin se inge kom in muh ahkoekomlac in kol mwe sramsram ke kuhlals an kac.
2. Sahp kom ac ke ahkolah in sap mwet ke kuhlals an in onkihñ soko on ke orekma ke tempuhl, kuh ke ma pwacye netok sin God me.
3. Fin oasr kahset in liyeyuck ke *Ekuh in Toeni luhn Sucu* (international) (5X736), sahþ kom ac ke sang in liyeyuck "Tempuhl Uh Ma nuh ke Olwelah Ma Pahtpaht," mihñit 6 lusac.

### LUTIYACN LESIN

Suli sie mwet an in ikacslah ke pruhe.

Siyuck sin mwet ke kuhlals an lah oacna oasr kuhtwena kihnsensiyuck lalos. Orekmakihñ pacl fal in topuk kihnsensiyuck an ke kuhiyom kwewa ac ke kolyuck sin Nguhn luhn Leum. Esam lah kuhtuh ohiyac ma orek ke tempuhl uh tiac enenuh in sramsramkihnyuck lihkihñ tempuhl.

### OREKMA KE TEMPUHL UH NUH OASR NA EKE PACL MET AH ME

Sahþ kom ac ke in tuhkweni ac onkihnyuck soko on ke orekma ke tempuhl kuh ke ma pwacye netok sin God me.

Ahkkahlwemye lah Leum el pacl nuh kwewa sapkihñ nuh sin mwet lal in muhsahelah tempuhl. El fahkwack orekma in oreklac lun tempuhl uh.

- Tempuhl kuh lohm nuknuk yac fwack ke ma suhmuhslah?

Ngihsre mwet ke kuhlals in sulpac liye intwacks ke ma suhmuhslah in konwacack fuhs ke tempuhl ac lohm nuknuk. Sahþ kom ac ke tahkuhñlah top luhn mwet ke kuhlals ke port an. Sahþ kom ac ke pac fahk mwet ke kuhlals in sulpac liye ma suhmuhslah tahklac inge:

Lohm nuknuk lal Moses: Exodus 40:1–2, 34–38

Tempuhl lal Solomon: 2 Kronikel 3:1–2; 5:1

Tempuhl lal Harod: Mattu 21:12–15

Tempuhl luhn mwet Nephi: 2 Nephi 5:16; Mosiah 1:18; 3 Nephi 11:1

Ahkuhtweyac lah ke srihpen puhtatlac liki ma pwacye sac, mwet uh lihksreni na muhluhlah srihpac pwacye luhn tempuhl ac elos nuh kwewa kuhnanuclac. Koanon orekma ke tempuhl nohfohn fohloh-kihnyuckme ke lwen lasr uh mihsenge sel Mwet Pahluh Joseph Smith, use mwe in sewowo yohk nuh ke moul lasr uh.

Elder Bruce R. McConkie el fahk: “Tulokyak ac orekmakihn tempuhl ke suhwos pa sie mwe ahkpwacye yohk ke orekma pwacye luhn Leum.... Ke acn ma oasr tempuhl we, nguhn ma fwackyuck oasr yohrohlos suc ahkfahsrye, wi mwet luhn Leum fah konweyuckyak; acn ma wacngihn ma inge we, Alu uh ac tohkohsrahi ac ma pwacye luhn inkuhsrao wacngihn” (*Mormon Doctrine*, 2<sup>nd</sup> ed. [1966], 781).

#### **ELOS SUC WI NUH TEMPUHL KE NWACSNWACS ULIYUCKYANG MWE INSEWOWO YOHK**

Tempuhl, kuh loh m sin Leum, pa acn suc ma kuht som in ahkolah moul ma pahtpaht ke tohkohsrahi luhn celestial. Kuht ahkyohkye lutlut lasr ke Pahpah Lucng ac Jisus Kraist we. Kuht oraclah olwelah Yohrohlos, ac Elos olwelah mwe in sewowo na wowo nuh sesr.

Ke Doctrine and Covenants, Leum el ahkuhtweyac mwe in sewowo ma tuhkuh nuh selos suc som nuh ke tempuhl ac moul nwacsnwacs in eis olwelah ma oreklac we. Kuhtuh sin mwe in sewowo inge pa ahkuhtweyucki ke sacksin 109, suc pa pruhe se ma orek ke akmuhsra ke tempuhl Kirtland. Kahs ke pruhe se inge ituckyang nuh sel Joseph Smith ke fwackyuck.

Prestuhn Howard W. Hunter el fahk lah kuht kais sie srackna eis mwe in sewowo se inge nekena lwen lasr mihsenge nuh facsr ekihn sucu, ac nuh facsr ekihn un mwet se ke srihpen kuh luhn pristut ma Leum el use nuh sesr in orekmakihn lun tempuhl muhtahl Lal” (“The Great Symbol of Our Membership,” *Ensign*, Oct. 1994, 4).

Prestuhn Hunter el kalweni in fahk kuhtuh sin fuhs ke sacksin 109 ah. Siyuck sin mempucr ke kuhlahs an in riti fuhs inge: Doctrine and Covenants 109:10–12, 22–23, 59, 67, 72, 75. Siyuck seltahl in suk mwe in sewowo ma Leum el fahk ingacn.

Tukun rit an, siyuck sin mempucr ke kuhlahs an in tahkuhlah mwe in sewowo ma eltahl akihlen an. Suhmuhsrah fahk laltahl an ke port an. Mwe in sewowo ma sruhmuhnyuck an enenuh ma inge in oasr kac:

1. Wolacna luhn Leum fah oan fin mwet Lal.
2. Mwet kuhlwcansap luhn Leum fah us kuh inge ac wolacna luhn Leum ke elos som liki tempuhl ac lupufacn ac fah karanganuhlo-syang.
3. Mwet kuhlwcansap luhn Leum fah us ma pwacye luhn wosasuc liki tempuhl nuh ke sahflahiyacn facluh.
4. Stek fah muhsahiyuckyak ac mwet luhn Leum in muh kuh in fahsreni.
5. Kwewana sruf fahsrelih luhn Israel fah luti ma pwacye ac engan.
6. Sucu luhn mwet luhlalfongi ac elos nuh kwewa mwet mas suc ahkkolukyeyuck fah esamyuck ye muhtuhn Leum.
7. Tohkohsrahi luhn Leum fah nwacklah facluh nohfohn.
8. Mwet kuhlwcansap luhn Leum fah sie lwen ututyak in ohsun nuh sin Leum ac fah weluhl netok.

*Ahok, El ac fah oasr [in lohm sel], tuh el fah tuhkuh nuh loac, na elos nuh kwewa ma nwacsnwacs insiac ac tuhkuh nuh loac fah liye God (liye D&C 97:16).*

- Fuhkah puhla lom ke kom nuhnkuh ke mwe insewowo na yohk ma uliyuckme nuh selos ma som nuh in tempuhl ke nwacsnwacs ac ahkfuhlwactye olwelah lalos uh?

Prestuhn Howard W. Hunter el fahk: “Yac oasr mwet ma oasr yohroh mwe insewowo yohk ma mokleyuck sin nguhn ac olwelah wowo! Arlac kahlwem lah Leum el kena mwet fahsr tohkohl in ahksuwoh syaclos nuh ke srihkarak Lal ac in fahsr nuh ke tempuhl Lal” (*Ensign*, Oct. 1994, 5).

Leum el oacyacpac oraclah olwelah srihpsrihp nuh ke tempuhl ke Doctrine and Covenants 97. Siyuck sin mempucr ke kuhlahs an in riti Doctrine and Covenants 97:15–21.

- Meac fuhs 15–17 luti kac lah meac mwet luhn Leum uh enenuh in oruh in fal in eis mwe insewowo sin Leum ke tempuhl Lal? (In nwacsnwacs insiac ac tiac lwelah kuhtwena ma fohkfohk in utyak nuh lun tempuhl.)

Ahkuhtweyac lah elos suc ma nwacsnwacs insiac pa pahngpahng Zion. Fuhs 15–21 luti lah kuht kuh in kahsrub muhsahi Zion pa in nwacsnwacs in ilyak nuh in tempuhl ac kampare in nwacsnwacs insiac ac tiac fohkfohklah ke ma fohkfohk.

- Meac mwe insewowo ma uliyuck ke fuhs inge nuh sin mwet nwacsnwacs ma ac pahngpahng Zion uh?

Ahkuhtweyac lah siti se pahngpahng Zion oasr na eke pacl emet ah me. Siti se inge muhsahiyuckyak sel mwet pahluh Enoch ac mwet lal. Utuckyak nuh inkuhsrao ke srihpen suwohswohs luhn mwet la ah (liye D&C 38:4; Moses 7:18–21, 69).

Zion ac fah oacyacpac oasr ke lwen sahflah. Ke Ip Yohk ke Luhlahlfongi ahk singucul, Leum el olwelah muh siti luhn Zion fah muhsahiyuckyak fin acn Macrke. Siyuck mwet ke kuhlahs an in riti ip yohk ke luhlahlfongi se inge. Ahkuhtweyac lah mwet Israel ma fahsrelih ac fah fahsreni nuh sie nuh ke siti luhlahp se inge (liye D&C 103:11–13).

Mihsenge, mwet ke Alu uh lutyuck in moul nwacsnwacs in wi som nuh ke tempuhl ac in muhsahi Zion ke oacna sie acn ma elos muhta we fin facluh. Kuht enenuh in oruh lohm sesr uh in oacna tempuhl—acn luhn nwacsnwacs, luhngse, ac fwackyuck ma kais sie kuh in eis.

- Meac kuht kuh in oruh in nwacsnwacs insiacsr uh?
- Ohiyac fuhkah facluh kuhtuh pacl uh oruh upac insiac uh in nwacsnwacs na uh?
- Ohiyac fuhkah kom kuh in kahsrhucu lom an, pracns, kuh ward in eklac in nwacsnwacs insiac uh?

Ahkuhtweyac lah elos suc ma oraclah ac sruokyacna olwelah ke tempuhl ac kampare ke moul lalos in srihke in nwacsnwacs insiac pa elos suc ma kuh in kahsrhucu muhsahi tempuhl.

#### SAHFLAH

Fahkwack puhla lom lah elos suc ma nwacsnwacs in utyak nuh in tempuhl fah eis mwe insewowo na yohk sin Leum, weacng in wi mwet luhn Zion. Kuht enenuh in oruh kuhiyacsr nohfohn in nwacsnwacs in eis mwe ahkinsewowo inge in muhtwacwacack in nwacsnwacs insiac.

Kom ac sahp luhngse sang in liyeyuck “Temples Are for Eternal Covenants.”

Suli sie mwet an in kaliyac ke pruhe.





## EIS AKWUCK AC OLWELAH KE TEMPUHL

*Ac fin wachngihn  
akwuck oreklac, ac  
wal luhn pristut,  
kuh muhtahl luhn  
God ac tiac  
ahkkahlwemyeyuck  
nuh sin mwet in  
ikoac (liye D&C  
84:21).*

### **SRIHPAC**

In kahsrüh mwet in kuhlahs an in kahlwem ke yohk srihpaciyacn akwuck ac olwelah ke tempuhl.

### **AHKOLAH**

1. Fin oasr ke acn sum an sahþ kom ac luhngse sang in liyeyuck petsac se ke *Together Forever* (53411) Petsac sacn oasr lusen mihnit 27 kac.
2. Sahþ kom ac luhngse ahkollah mempucr ke kuhlahs an in onkihn "More Holiness Give Me" (*Hymns*, nempuh 131).

### **LUTIYACN LESIN**

Suli sie mwet an in ikacslah ke pruhe.

Siyuck sin mwet ke kuhlahs an lah oacna oasr kuhtwena kihsensiyuck lalos. Orekmakihn pacl fal in topuk kihsensiyuck an ke kuhiyom kwewa ac ke kolyuck sin Nguhn luhn Leum. Esam lah kuhtuh ohiyac ma orek ke tempuhl uh tiac enenuh in sramsramkihnyuck lihkihn tempuhl.

### **LUN TEMPUHL KUHT EIS AKWUCK AC ORACLAH OLWELAH**

Ahkuhtweyac lah lun tempuhl kuht eis akwuck ma ac use lwelah nuh sesr in fohlohk nuh yurin God. Kuht oacyacpac oraclah olwelah in moulkihn masap luhn wasasuc. Kuhfa tahklac inge fah use ma in etweyuck ke akwuck ac olwelah ke ma nuh kwewa, ac akwuck ac olwelah ke tempuhl orekwelihk nuh ke srihpac la an.

### ***Akwuck***

Ahkuhtweyac lah akwuck uh pa sie mukwikwi in alu muhtahl ma oasr kalmac se la ac ma ac oruh in nguhn.

Siyuck sin mempucr ke kuhlahs an in fahk kuhtuh akwuck ke Alu uh. (Eltahl ac fahk muh pa sang ine ac ahkinsewowoye tuhlihk srihsrihk, pacptais, ahkkweyelah, kuhfa luhn Leum, akmuhsra nuh ke pristut, ac akwuck ke tempuhl.)

Ahkuhtweyac lah akwuck orek ke kuh luhn pristut uh yohk srihpac nuh ke moul ma pahtpaht lasr uh. Ke srihpen akwuck inge pa oruh kuht eis kuh luhn God in moul lasr uh.

Siyuck mempucr ke kuhlals an in riti Doctrine and Covenants 84:19–21.

*“Kuht olwelah in sang ma oasr yohrohsr ke pacl ac mani ac talan—eiskuhtyang kwewa ac ma nuh kwewa lasr—nuh ke kena luhn tohkohsrahi luhn God fin facluh” (Ahkollah in Utyak Nuh ke Tempuhl Muhtahl, 35).*

• Meac ac enenweyuck kuh luhn God uh in muh ahkkahlwemyeyuck ke moul lasr uh? (Akwuck luhn Melchizedek Pristut. “Pristut se ma yohk” ah pa fwack ke fuhs inge pa Melchizedek Pristut.)

Sap mempucr ke kuhlals an in olanglah nuh ke sra puk 29 ke *Ahkollah in Utyak nuh ke Tempuhl Muhtahl*. Siyuck sie mempucr ke kuhlals an in lihksreni riti mwe fahk se tok inge:

“Fuhkah yohk srihpacyacn akwuck inge nuh sesr in ekihn mempucr ke Alu uh?

“Kuh kom kuh in engan fin wacngihn akwuck ke tempuhl, kuh kom kuh in langoeyucklac fin elos wacngihn, yac kom kuh in eis moul ma pahtpaht yurin God fin wacngihn? Top: Akwuck ke tempuhl yohk likina in fahk muh wo kuh fal, ac finne yohk liki na enenweyuck. Eltahl yohk liki na yohk srihpac kuh enenweyuck. Eltahl kahlwem na pwacye lah yohk enenweyac nuh sin kais sie sesr.”

### **Olwelah**

Ahkkahlwemye lah olwelah uh ma muhtahl se inmahsrlon God ac mwet se kuh un mwet se. God el oraclah kain in ohiyac, ac El olwelah in ahkinsewowoyaclos suc ahkos ohiyac inge. Ke kuht sulaclah in tiac liacacng olwelah uh, kuht tiac kuh in eis mwe insewowo, ac ke kuhtuh pacl, kuht kweok ke mwe kai in sruhluhn pa ma sikyak ke seahkostwen. Akwuck in sefiac luhn pristut wacna srihpsrihp nuhke olwelah.

• Olwelah fuhkah kom oraclah yurin Leum neke pacl se inge ke moul lom an? (Mwet in kuhlals an ac fahk olwelah ke pacptais, suc ma ahksasucyeyuck ke kais sie pacl kuht eis kuhfa luhn Leum.)

• Olwelah fuhkah ma kuht oraclah ke pacl se ma kuht pacptaislac ah? (liye Mosiah 18:8–10; D&C 20:37.)

Ahkkahlwemye lah ke kuht oraclah olwelah yurin God uh, kuht ahkkahlwemye kena lasr in kuhlwacnsuhpwac ac luhngse lasr in ahkos ma nuh kwewa ma siyuckyuck sesr uh. In sang topuk, God el olwelah nuh sesr mwe insewowo pucspucs. Kuht enenuh in oraclah ac liyacacng olwelah kuht in muh kuh in kapkapwack nuh ke moul ma pahtpaht.

### *Akwuck ac Olwelah ke Tempuhl*

Ahkuhtweyac lah akwuck ke tempuhl pa eis mwe sang muhtahl ac sil (macruht ke tempuhl ac sil luhn pahpah ac ninac nuh sin tuhlihk) nuh sin kwewa na mwet moul ac mwet misac. Akwuck luhn pacptais nuh sin mwet misac orek ke tempuhl, oacna akwuck luhn pristut sahyac. Ke akwuck lun tempuhl uh, kuht oraclah olwelah muhtahl in eiskuhtyang sifacna nuh sin God ac in kahsrüh muhsaheack tohkohsrahi Lal fin facluh.

Elder James E. Talmage el fahk ke olwelah ma kuht oraclah ke eisyacn mwe sang muhtahl ke tempuhl:

“Akwuck ke eisyacn mwe sang muhtahl uh ahol wihlwihl ke kais sie ip luhn kais sie mwet oacna olweacng ac olwelah in akihlen masap luhn ohiyac wowo ac tiac kosro, in oasr na luhngse, fokoko, suwohs ac pwacye, in kihsackuhnwacng kwewana talan ac ma nuh kwewa la, nuh ke fahkwelihk luhn ma pwacye, ac mokle mwet uh, in sruokyacna pacl yohk laltahl nuh ke srihpac luhn ma pwacye, ac in suk inkacnek nuh kwewa in sang kahsrüh nuh ke ahko-o luhlahp se ke facluh in fah ahkoeyucklac in eis tohkohsrahi Lal—Leum Jisus Kraist. Ke oreklac luhn kais sie olwelah ac ke eisyacn wihlwihl oasr ahkkahlwemyeyacn olwelah nuh ke mwe in sewowo, wiwi na tuniacn suwohs luhn ohiyac” (*The House of the Lord*, rev. ed. [1976], 84).

Sahp kom ac ke sifil sramsram ke olwelah ma ahkkahlwemyeyuck tuh fahna tari ac in suhmuhslah ke port an. Ahkkahlwemye lah kuht oraclah olwelah kuht in muh suwohs ac nwacsnwacs, ac kuht oacyacpac oruh olwelah in sang ma nuh kwewa lasr in muhsahi tohkohsrahi luhn Leum. Riti mwe fahk inge:

“Kuht un mwet olwelah se. Kuht olwelah in sang ma oasr yohrohsr ke pacl ac mani ac talan—eiskuhtyang kwewa ac ma nuh kwewa lasr nuh ke muhsahiyacn tohkohsrahi luhn Leum fin facluh” (*Ahkolah in Utyak nuh ke Tempuhl Muhtahl*, 35).

- Inkacnek fuhkah kuht kuh in oruh in “eiskuhtyang kwewa ac ma nuh kwewa lasr” nuh ke tohkohsrahi luhn God uh?
- Meac tulokihn mempucr kuhtuh pacl uh in tiac sang ma nuh kwewa lalos nuh ke tohkohsrahi luhn Leum uh?

Sahp kom ac luhngse akacsruhi luhlahlfongi lom ke mwe in sewowo ma tuhkuh nuh ke moul lom ke srihpen kom oraclah ac liyacacng olwelah ke tempuhl. Kuh sah p kom ac luhngse siyuck sin sie mwet ma eis tari mwe sang muhtahl la ke tempuhl in akacsruhi luhlahlfongi lal.

### KUHT ENENUH IN OARU NUH KE OLWELAH MA KUHT ORACLAH KE TEMPUHL

Ahkkahlwemye ma Leum el fahk, “Nuh sel suc ituckyang ma pucspucs nuh se, fwa siyuckyuck ma pucspucs sel” (Luk 12:48).

- Kom nuhnkuh tuh fuhs se inge orekmakhinyuck fuhkah nuh ke olwelah ma kuht oraclah ke tempuhl uh?

Ahkkahlwemye lah Leum el use akwuck ac olwelah ke tempuhl uh tuhlihk nahtuhl in muh kuh in kahlwem ke srihpac luhn moul se inge ac in ahkolah nuh ke pacl wolacna luhn moul ma pahtpaht. Ke kuht eis mwe insewowo inge, kuht muhtwacwacack in sifacna nuhnkuh moul lasr in fal nuh ke yohkyohkwacliik luhn etwacack ac pacl wowo lasr uh. Ahkuhtweyucki lah kuht enenuh in oaru nuh ke olwelah ma oreklac ke tempuhl.

- Efuh yohk srihpac in oaru nuh ke olwelah ma kuht oraclah ke tempuhl uh?

Siyuck sin mempucr ke kuhlans an in riti Doctrine and Covenants 82:10.

*Ac Leum el kapriac pacl se kom oruh ma el fahk uh tuh-sruhk pacl se kom tiac oruh ma el fahk uh, wacngihn olwelah Lal nuh sum (liye D&C 82:10).*

Prestuhn Joseph Fielding Smith el fahk: “Nga fahk nuh suwos *Leum el tiac kapriac ma uh, nekena kom karuhnganwacng olwelah*. Leum el soenna wi kuhnaoslah olwelah lal uh. Ke el oraclah sie olwelah nuh sin sie sesr, el ac fah tiac kuhnaoslah. Fin ac muhsahllah, kuht pa ac kuhnaoslah uh. Tuhsruhk ke muhsahllah uh, el ac fah tiac use nuh sesr mwe insewowo, ac kuht fah tiac eis” (*Doctrines of Salvation*, comp. Bruce R. McConkie, 3 vols. [1954–56], 2:256–57).

### OARU NUH KE OLWELAH AC FAH USE MISLAC AC KARIHNGIHNYUCK

Ahkkahlwemye lah tempuhl uh pa sie acn in mislac ac nien monglac ke sie facl tikuckucl. Ke kuht fahsri tempuhl pacl nuh ke pacl ac oaru nuh ke olwelah lasr uh, kuht ac fah konwacack mislac, karihngihnyuck, ac kolyuck nuh ke moul lasr uh.

Elder Neal A. Maxwell el fahk, “Fin kuht karuhnganwacng olwelah lasr uh, olwelah lasr uh fah karihngihn kuht in nguhn” (ke Conference Report, Apr. 1987, 87; kuh *Ensign*, May 1987, 71).

- Ke inkacnek fuhkah olwelah ma kom oraclah neke pacl se inge uh kaksre kom in karihngihn kom in nguhn?

Fahk lah ke tempuhl kuht olwelah in moul nwacsnwacs in fohlohk nuh yurin Pahpah Lucng ac Jisus Kraist. Kuhtuh pacl uh, ke infulwen tikuckucl lasr pengana lwen, sahp kuht ac nuhnkuh lah oacna moul se inge kuh kuht in muh fohlohk nuh yurin Pahpah Lucng.

Siyuck sin mempucr ke kuhlals in riti 1 Nephi 17:3, 13.

- Meac ma suhmuhslah inge luti ke Leum el ac kahsrüh fuhkah ke kuht kampare in fohlohk nuh Yohrohl uh? Kom liye fuhs inge ahkpwacyeyuck ke moul lom an fuhkah?

Elder Boyd K. Packer el fahk: “Ke kom tuhkuh nuh ke tempuhl ac eis mwe sang muhtahl lom, ac sikuck muhtuhnte ke mwe loang ac sili, kom kuh in moulkihn moul na fal se ac oacna sie mwet fal moul la—tikuclkucl in lain mwe sruhf, puhtatlac ac auliyak, ac sulpac puhtatlac ac auliyak, tuhsruhk ahkolah pacl nuh kwewa in liacacng olwelah lom.... Na lwen sac ac fah tuhkuh ke kom ac fah eis mwe insewowo: ‘Wo orekma lom, mwet kuhlwacnsap wo ac oaru: kom oaru in ma puh, nga ac fah ahkfuhlwactye kom fin ma puhs; kom in ilyak nuh in engan luhn Leum lom’ (Mattu 25:21)” (*Let Not Your Heart Be Troubled* [1991], 257).

Prestuhn Howard W. Hunter el suli kuht in fahsri tempuhl “nuh ke mwe insewowo nuh sesr sifacna ke ahkfuhlwact ke tempuhl uh, nuh ke muhtahl ac karihngihnyuck ma utuckuh lun tempuhl. Tempuhl pa sie acn oaskuh, acn luhn fwackyuck, acn luhn mislac. Pa lohm sin Leum. Muhtahl nuh sin Leum. Enenuh in muhtahl nuh sesr” (itucklac ke Jay M. Todd, “Prestuhn Howard W. Hunter,” *Ensign* July 1994, 5).

#### SAHFLAH

Siyuck sin mempucr ke kuhlals an in akacsruhi puhla lalos ke mwe insewowo ke eisyacn akwuck ke tempuhl ac oraclah olwelah nuh sin Pahpah Inkuhsrao.

Fin pacl an lwelah ac petsac ke *Together Forever* oasr ke acn sum an, kom kuh in sang in liyeyuck.

Sahp kom ac ke mempucr ke kuhlals an in onkihn “More Holiness Give Me.” Fahk luhlalhfongi lom ke mwe insewowo ke eisyacn akwuck ke tempuhl ac pacl wowo in ilyak nuh ke olwelah yurin Pahpah Inkuhsrao.

Suli sie mwet an in kaliyac ke pruhe.



## EIS ETWACACK SIN LEUM KE AKUCL

*El ac fah sang nuh sin tuhlihk nuhtin mwet lain nuh fin lain, luti nuh fin luti, kuhtuhsrihk inge ac kuhtuhsrihk ingo; ac insewowo nuh selos suc ma lohacng ahkwoyac nuh ke luti lal uh (liye 2 Nephi 28:30).*

### SRIHPAC

In kahsrüh mēpucl ke kuhlahs an in kahlwem ac srui ke orekma-kihnyacn akucl ke tempuhl.

### AHKOLAH

1. Us sie flwack ke acn sum an kuh sie petsac ke flwack ke acn sum an.
2. Siyuck sie mēpucl ke kuhlahs an in ahkfototoyelah sramsram ke sie sin mwet lili an tuh tohpohklah sie kihnsensiyuck ke karmacn lun tempuhl uh fuhkah. Sramsram soko inge konweyuckyak ke srapuk 20–21 ac 23 ke *Ahkolah in Utyak nuh ke Tempuhl Muhtahl*.

Mwe ahkkahlwemye nuh sin mwet luti: Akwuck ke tempuhl ac olwelah uh muhtahl, ac sramsram ma orek kac uh oasr luhpah fal se oreklac nuh kac ke tempuhl. Ohinge, sramsram ke kuhlahs kac uh enenuh in oreklac luhpah fal nuh ke ahkuhtweyac ke puk in kol se inge.


### LUTIYACN LESIN

Suli sie mwet an in ikacslah ke pruhe.

Siyuck sin mwet ke kuhlahs an lah oacna oasr kuhtwena kihnsensiyuck lalos. Orekmakihn pacl fal in topuk kihnsensiyuck an ke kuhiyom kwewa ac ke kolyuck sin Nguhn luhn Leum. Esam lah kuhtuh ohiyac ma orek ke tempuhl uh tiac enenuh in sramsramkihnyuck lihkihnh tempuhl.

### AKUCL UH YOHK SRIHPAC NUH KE MOUL LASR PENGANA LWEN

Ahkkahlwemye lah akucl uh orekmakihnyuck pacl nuh kwewa in moul lasr. Srolwaclah ma inge kuh kuhtuh akucl fal sahyac ke port an. Siyuck sin mwet ke kuhlahs an in fahk lah meac kalmacn kais sie akucl inge.



Sang kuhlals an in liye flwack ke acn sum an kuh sie petsac ke flwack sacn ac siyuck selos in fahk lah meac kalmacn flwack sacn selos.

- Meac kuhtuh ma sahyac kuh kuhtuh mukwikwi ma fahkwack acn se uh? (Soko on, sie fohrm ke nuknuk, sie ipin nuknuk, sie lwen luhlahp, kuh sie ahkfuhlwact.)

Fahk lah akucl inge suc fahkwack kuh ahollah ma ke acn se.

- Meac kuhtuh akucl nuh ke luhngse ac ahkfuhlwact uh? (Sie mwe sang kuh sie ring, angokmwet kuh asruhilac se, sie atacn sroal.)
- Yac akucl uh sang kalmac se fanna nuh sin mwet nuh kwewa? Efuh kuh efuh tiac?
- Efuh kuht orekmakihn akucl?

Sang mempucr ke kuhlals an in sramsramkihn. Sahp elos ac sruhkwack kuhtuh nuhnak oacna ma tahklac inge:

1. Akucl uh kuh in kaksre kuht esam ma yohk srihpac uh.
2. Akucl uh kuh in luti kuht ma pwacye ma ac upac in etuh kac ke ohiyac sahyac uh.
3. Akucl uh kuh in fahkwack puhla uh.
4. Akucl uh kuh in luti kain in ip yohk fal nuh ke ahkolah lasr sifacna in etuh kac uh.

Ahkkahlwemye lah ke akucl uh kalweniyuck uh, yohkwaclihk kahlwem lasr kac.

#### **JISUS KRAIST AC MWET PAHLUH LAL OREKMAKIHN AKUCL**

Ahkkahlwemye lah Mwet Lahngo el orekmakihn na akucl uh pacl El luti ac.

- Meac kuhtuh ohiyac ma Leum el orekmakihn akucl ke luti uh?

Mempucr ke kuhlals kuh in fahk kuhtuh ma oacna sip tuhlac (liye Mattu 18:12–14); sie fihtac in mustard (liye Mattu 13:31–32); kuh sie wek [pearl of great price] (Mattu 13:45–46).

- Kom nuhnkuh tuh oacna efuh Mwet Lahngo el orekmakihn akucl pacl El luti ac?

Sang mempucr ke kuhlals an in sramsramkihn. Na sulpac liye fahk se tohkoh inge:

“Leum el sifacna, Mwet Luti Fuhlwact se, ke luti Lal sifacna nuh sin mwet tuhma lutlut Lal luti pacl nuh kwewa ke puhpuhlyuck, sie ohiyacn sramsram in fahkwack akihlenyacn ma suc ac kuh in upac in kahlwem uh. El sramsramkihn ma puhlahkihnyuck pacl nuh kwewa

itucklac ke moul luhn mwet tuhma lutlut Lal, ac El sruhmuhn ke won muhtwacn ac won nuht, won sohksok, ros, kosro, sahk, mwet puhsr, mwet puhsr ke inkacnek, tili luhn faht, mwet kahsrup ac mwet suhkahsrup.... El sramsramkihn fihtacn mustard, ke mwek. El kena luti mwet Lohngohl uh, pa El sramsram ke ma srihsrihk ke kalmeyacn akucl. Wacngihn sin ma inge ma lukmac kuh tiac etweyuck ac elos nuh kwewa orekmakihnyuck nuhke akucl” (*Ahkolah in Utyak nuh ke Tempuhl Muhtahl*, 8).

Ahkkahlwemye lah mwet pahluh ac mwet sap wacna orekmakihn akucl in luti ke Jisus Kraist ac kihsac in iwaclah Lal. Iwaclah luhn Jisus Kraist pa pwelucng luhn wosasuc ac mwe in sewowo nuh kwewa kuht eis uh. Oruh molwelah uh in kuh. Ke ma inge, inkaiyacn akucl ke ma suhmuhslah uh luti kuht ke Mwet Lahngo ac kihsackuhnlah Lal.

Siyuck mempucr ke kuhlahs an in riti Moses 6:63.

- Meac ma oan fin facluh ma fahkwack ke Mwet Lahngo uh?

Siyuck mempucr ke kuhlahs in riti Alma 13:16.

- Ohiyac fuhkah ma akwuck ke pristut uh orekma loh kac ke Mwet Lahngo uh?

Fahk lah met liki Mwet Lahngo el oraclah iwaclah sac, mwet olwelah Lal kihsackihn kosro in sie akucl ke kihsac in iwaclah Lal (liye Moses 5:4–8). Ohiyac se ingacn sahflah ke misac ac moulyak luhn Mwet Lahngo. Inge Leum el sapkihn nuh sesr in sang in sie mwe kihsac nuh [Sel] sie inse ahsor ac toasr luhn nguhn” (3 Nephi 9:20). Ac akwuck ke pristut kahsre kuht in srack esam kihsac ke iwaclah luhn Mwet Lahngo. Elder Russell M. Nelson el tuh luti:

“Enenuh luhn akwuck ke wosasuc uh akucl luhn iwaclah se. Pacptais ke tili otyak uh akucl nuh ke misac, puckpucki, ac Sifil Moulyak luhn Mwet Lahngo. Ipeis ke kuhfa luhn Leum ahksasucye olwelah ke pacptais ac oacyacpac ahksasucye esam lasr ke muhsahllah luhn ikwen Mwet Lahngo ac ke srah El ahksohrohrye kacsr. Akwuck ke tempuhl uh akucl nuh ke ahkwoyeyacn kuhpahsr lasr nuh sin Leum ac siliyac sucu uh nuh sie netok” (ke Conference Report, Oct. 1996, 47; kuh *Ensign*, Nov. 1996, 35).

#### AKUCL UH LUTI KUHT MA PWACYE UH FIN KUHT AKIHLEN KE NGUHN

Akkahlwemye lah ke Mwet Lahngo el moul muhta fin facluh ah, Mwet tuhma lutlut Lal ah siyuck Sel lah efuh el luti ke puhpuhlyuck. Puhpuhlyuck pa sramsram ma luti ke ma pwacye yohk srihpac uh, wacna orekmakihnyuck kahs nuh ke akucl uh. Sap mempucr ke kuhlahs an in riti Mattu 13:10–12 in etuh lah meac Mwet Lahngo el fahk.



- Oacna kom nuhkuh tuh meac kalmeyac sin Mwet Lahngo ke El fahk ma se inge ah?

Ahkkahlwemye lah Leum el fahkwack ma pwacye uh nuh selos ma ahkolah ke nguhn in kahlwem kac uh. Elos suc eis ma pwacye ke luhlalfongi ac ahkostwen uh tahfwelah na in eis kuhtuh pac ma pwacye uh. Elos ma tiacna ahkolah ke nguhn ac ma koflah in eis ma pwacye uh kuh ma eis ke sie inse ahlohloh uh ac kais kuhtuhsrihk na wacngihnlac ma pwacye ma oasr selos uh.

Sramsram ma orekmakihn akucl uh fahkwack ma pwacye ke sie ohiyac ma elos suc ahkolah ke nguhn uh kahlwem ke kalmacn akucl inge. Elos suc tiac ahkolah uh tiacna kahlwem ke kalmac an.

Kuhtuh mwet ke pacl luhn Mwet Lahngo ah kahlwem ke kalmacn puhpuhlyuck Lal ah, tuhsruhku puhs selos tiac. Kain se inge oasr mih-senge. Puhs luhpah luhn kahlwem ke nguhn inmahsrln mempucr suwohswohs ke Alu uh.

Sap mempucr ke kuhlahs an in riti 2 Nephi 28:30 ac Doctrine and Covenants 42:49–50.

- Meac ma suhmuhslah inge luti kac ke kuht lutlut ke ma pwacye sin God uh?

Ahkkahlwemye lah ac kuh nuh sesr kwewa in kapwack ke nguhn nuh ke sie luhpah ma kuht kuh in kahlwem ke kalmacn akucl orekmakihnyuck ke wasasuc uh, ke ma suhmuhslah uh, ac yohk na lun tempuhl uh.

#### LUTLUT KE AKUCL MA MUHTAHL EMET UH EISYUCK LUN TEMPUHL

Ahkkahlwemye lah luti ke akucl ma muhtahl emet fin facluh uh eisyuck lun tempuhl. Ke sie ohiyac ke akucl, luti ac oruh muhtahl ke tempuhl eiskuhtyang nuh ke sie fuhfahsryucsr nuh met nuh ke moull ma pahtpaht, sahflah ke sie akucl luhn nien utyak nuh ke acn God el muhta we. Ahkkahlwemyeyacn mwet uh, ahkolah mahno, nuknuk nukumyuck ituckyang sain, ac ma sikyak nuh kwewa sramsramkihnyuck lun tempuhl orek ke akucl. Pacl se ac kahlwem uh, elos ac kahsrh kais sie mwet in akihlen ma pwacye ac kapwack ke nguhn.

Kuhtuh akucl inge suwohslah nuh met, ac kalmac uh ahkoeyucklac in fihsracsr in liyeyuck. Tempuhl sifacna el sie akucl:

“Fin kom liye tari sie tempuhl ke fong uh, ahkokyak nohfohn lahm kac, kom etuh lah fuhkah ngwetngwet se ac sikyak kac an. Lohm sin Leum rauniyucklac ke kahlwem, tuyak inmahsrln lohsh uh, eklac tuh akucl ke kuh ac kolyuck ke wasasuc luhn Jisus Kraist tu oacna so-ko sahk lun sie facl suc tili som nuh lun nguhnin lohsh uh” (*Ahkolah in Utyak nuh ke Tempuhl Muhtahl*, 10).

*Ma nuh kwewa  
oasr oacna sie la,  
ac ma nuh kwewa  
luhmweyucklac ac  
oreklac in sang  
fahkyucyak, kwe-  
wana ma luhn  
mahno, ac ma suc  
ma luhn nguhn  
(liye Moses 6:63).*

Nuknuk nuh ke tempuhl uh orekmakihnyuck pac in mwe akucl. Pacl kuht utyak nuh ke tempuhl uh, kuht ahollah nuknuk nuh inkacnek uh nuh ke nuknuk fasrfasr nuh tempuhl, suc pa akucl se luhn nwacs-nwacs. Prestuhn James E. Faust el fahk:

“Muhtwacwacyacn alu tempuhl uh pa ip yohk se ma muh ‘God el tiac sulohsohl mwet.’ [Orekma 10:34.] Lun sinkac muhtahl ke tempuhl, wacngihn srelah nuh sin mwet uh, lah el kahsrup, mwet meac se, tuhn fuhkah, kuh lah el lutlut. Nohfohnna nuknuk fasrfasr. Nohfohnna eis ahkuhtweyac se fanna. Nohfohnna eis fuhlwact se fanna, mwe insewowa netok fin elos moul fal in eis. Nohfohnna oacna sie ye muhtuhn Mwet Oracloslac” (ke Conference Report, Apr. 1997, 23; kuh *Ensign*, May 1997, 20).

Ahkkahlwemye lah mempucr ma eis akwuck ke tempuhl ac oraclah olwelah nuh sin God uh ac nukum karmacn (nuknuk loac se) ke moul lalos luhlah an. Riti fahk se ten inge:

“Karmacn uh fahkwack olwelah muhtahl uh. El ahkyohkye nwacs-nwacs ac eklac sie mwe loang ac karihngihnyuck nuh sin mwet nukum uh.... Karmacn uh, nokomlah mahno uh, sie mwe ahkacsmak kuh in liyeyuck ac kahlyuck ke [olwelah oreklac ke tempuhl]. Nuh sin mempucr pucspucs ke Alu uh karmacn uh el oraclah sie kohsrkohsr in loangwelah pacl se mwet nukum uh sun mwe sruhf uh. Wi pac ma sahyac an el akihlenyacn ahkfuhlwact na yohk lasr ke masap luhn God—inmahsrton ma ngwacn masap ke in etuh ma wo liki ma koluk” (*Ahkolah in Utyak nuh ke Tempuhl Muhtahl*, 20, 23).

Siyuck mempucr se ke kuhlahs ma srihsrngiyucki ac in sruhmuhn in fototo lah fuhkah ahkuhtweyac luhn sie mukul ke srihpac luhn karmacn ke tempuhl uh (liye *Ahkolah in Utyak nuh ke Tempuhl Muhtahl*, 20–21, 23).

Ahkkahlwemye lah apkuhran in ohiyac nuh kwewa ke mukwikwi in alu in tempuhl uh orek ke akucl. Karmacn ma se inge pa kais sie mwet enenuh in ahkolah in akihlen ke nguhn ke kuhiyac ma oreklac sin God ke akucl luhn mwe sang lun tempuhl uh.

- Meac kuh in kosraclah sie mwet in tiac akihlen nguhn lun tempuhl uh?

Mempucr ke kuhlahs ac kuh in fahk kuhtuh ma oacna ma tahklac inge:

1. Sie mwet sahp ac tiacna nwacsnwacs. Sie mwet suc tiacna auliyak na pwacye ac tiacna ahkolah ke puhsisacl ac ke pruhe nuh ke tempuhl ac konwacack lah akucl ingacn ac wacngihn kalmeyac ac karmac an ac wihklac (liki kahlwem lasr uh).

2. Sie mwet suc srihklac luhlalhfongi la. Mwet se ma wacngihn luhlalhfongi la ke Jisus Kraist ac ke mukwikwi in alu ke tempuhl uh ac tiac kuh in eis kolyuck luhn Nguhn Muhtahl ma enenweyuck in kahlwem ke mwe sang lun tempuhl uh.
  3. Sie mwet el ac kuh in lohacng yohklac nuh ke mukwikwi in alu nuh ke mahno uh in pwacnwacng elan tiacna liye luti na fokoko aholyucklac ke akucl uh.
- Kuht ac kuh in ahkolah in akiklen ma luhn nguhn fuhkah lun tempuhl?

#### SAHFLAH

Sruhmuhn lah elos ma som nuh ke tempuhl ke pacl se emet kuh in sano in eis etwacack ke ma sasuc pucspucs ac puhlakihn kuh ke Nguhn luhn Leum. Ahkkweye mempucr ke kuhlahs in ahkoeloslac sifacna in nguhn nuh ke oruh lalos lun tempuhl uh. Ahkacsmakihnyaclos lah kais sie ma inge kwewa tiac kuh in kahlwem ke muhtwacta se fanna nuh ke tempuhl uh. Elos enenuh in fohlohklac nuh ke tempuhl ke pacl kuh an elos in muh tahfwelah na in luti ac in ahksasucye puhla lalos ke nguhn uh.

Suli sie mwet an in kaliyac ke pruhe.



## AHKOLAH IN UTYAK NUH KE TEMPUHL MUHTAHL

*Ac mweyen mwet  
luhk muhsahelah  
sie lohm nuh sihk  
ke inen Leum, ac  
tiacna lwelah tuh  
oacna sie ma fohk-  
fohk in utyak nuh  
loac, in tiac fohk-  
fohklah, wolacna  
luhk fah an fac  
(liye D&C 97:15)*

### **SRIHPAC**

In ahkolah mempucr ke kuhlals an in nwacsnwacs in utyak nuh ke tempuhl.

### **LUTIYACN LESIN**

Suli sie mwet an in ikacslah ke pruhe.

Siyuck sin mempucr ke kuhlals an lah oacna oasr kuhtwena kihsen-siyuck lalos. Orekmakihn pacl fal in topuk kihsensiyuck an ke kuhi-yom kwewa ac ke kolyuck sin Nguhn luhn Leum. Esam lah kuhtuh ohiyac ma orek ke tempuhl uh tiac enenuh in sramsramkihnyuck lihkihn tempuhl.

### **KAIS SIE MWET ENENUH IN AHKOLAH NUH TEMPUHL**

Ahkkahlwemye lah ma kunacn kais sie mwet in sifacna oruh ma inge in kohlohlos in eis nohfohn mwe in sewowo ke tempuhl uh.

Sramsramkihn nuhnak limekohsr tahklac inge in fototo. Kais sie use inkacnek se suc ma kuht enenuh in ahkoelah in utyak nuh ke tempuhl. Sahn kom ac ke tahkkuhnlah kais sie ma ke port an pacl se kom sramsramkihn an.

1. Kais sie mwet enenuh in nwacsnwacs.

Siyuck mempucr ke kuhlals an in riti Doctrine and Covenants 97:15–17.

- Meac mwe rit se inge luti kom kac ke yohk srihpac luhn nwacs-nwacs pacl se kom utyak nuh ke tempuhl uh?

Prestuhn Howard W. Hunter el siyuck sesr in nuhnkuh ke “ohiyac ac elah suwohswohs ma Leum el srihsrangi kuht nuh kac ke kabs in kah-sruh el sang nuh sin Mwet Luhlahlfongi Lal Kirtland sin Mwet Pahluh Joseph Smith ke elos ahko-o in muhsahi sie tempuhl ah.”

Kabs in kahsruh se inge oasr ke Doctrine and Covenants 88:119. Siyuck mempucr ke kuhlals in riti mwe rit se inge.

Siyuck sin mempucr ke kuhlals sacn in nuhnkuh pac siyuck se tohu-yak sel Prestuhn Hunter an: “Yac pwacye lah ohiyac ac elah inge kuh

in use ma kais sie sesr kena ac suk in oasr kac uh?" ("The Great Symbol of Our Membership," *Ensign*, Oct. 1994, 2).

2. Kais sie mwet enenuh in puhsisacl.

Kais sie mwet enenuh in utyak nuh in tempuhl ke puhsisacl, ke sie kena in lutyuck lucng me.

- Efuh puhsisacl uh arulacna yohk srihpac ke kuht kuhlwasnsap ac lutlut lun tempuhl uh?

Sap mempucr ke kuhlahs in riti Doctrine and Covenants 136:32–33.

- Meac mwe rit se inge luti ke yohk srihpac luhn puhsisacl uh? Kom ac kuh in orekmakihn kahs in kahsrüh se inge fuhkah nuh ke som nuh in tempuhl ke pacl se emet uh?

3. Kais sie mwet enenuh in kahlwem kac lah eis akwuck ac olwelah lun tempuhl uh arulacna enenweyuck nuh ke eis moul ma pahtpaht uh.

Prestuhn Harold B. Lee el fahk: "Mukwikwi in alu lun tempuhl uh ma tahkihnyucklac sin Pahpah Lucng na lahlmwetmwet se suc fahkwack nuh sesr ke lwen sahflah inge in sie mwe kol ac sie mwe karihngihnyuck ke lusen moul lasr, nga ac kom in muh tiac kuf in wi eis opi luhn moul ma pahtpaht yurin God ke tohkohsrahi luhn celestial ma God ac Kraist muhta we" ("Enter a Holy Temple," *Improvement Era*, June 1967, 144).

Prestuhn Fielding Smith el fahk: "Mwe in sewowo inge tuhkuh nuh sesr, ma ke oaru lasr, wek suc yohk molo [pearl of great price] ma Leum el use nuh sesr, ke srihpen *ma inge pa mwe in sewowo yohk emet kuht kuh in eis ke moul se inge*. Sie ma na wowo pa in sie mempucr ke Alu uh, tuhsruhkom kom tiac kuh in eis sie moul ma pahtpaht yurin God nekena kom oraclah olwelah lun lohm sin Leum ac eis ki ac kuh ma ituck we ac suc tiac kuh in ituck ke kuhtwena acn sahyac fin fac-luh mihsenge" (*Doctrines of Salvation*, comp. Bruce R. McConkie, 3 vols. [1954–56], 2:253).

4. Kais sie mwet enenuh in kahlwem ke yohk srihpaciyacn nukumyacn karmacn ke tempuhl uh.

Ahkkahlwemye lah elos suc wi mukwikwi in alu ke tempuhl uh eis pacl wo la in nukum karmacn ke pristut muhtahl uh. Ke sie fahk nuh sin Alu uh, Prestuhnsi Se Met fahk:

"Mempucr ke Alu uh ma nokomwacng karmacn lun tempuhl ah elos oraclah sie olwelah in nukum ke lusen moul laltahl. Ma se inge tuh ahkkahlwemyeyuck in kalmac pa in nukumyuck oana nuknuk loac se ke oacna sie lwen ac fong....

*Ahkfasye kom sifacna; ahkolah ma yohk enenweyuck nuh kwewa; ac akiac sie lohm, finne sie lohm in pruhe, sie lohm in lalo, sie lohm in luhlalhfongi, sie lohm in eis etwacack, sie lohm engan, sie lohm fas, sie lohm sin God (liye D&C 88:119).*

“Sramtweack luhn ip yohk se inge pa in nukum na karmacn uh ac ti- ac sukok pacl in eslah.... Pacl se karmacn an enenuh in itucklac an,... enenuh in sa na sulpac nukumyuckyang.

“Ip yohk luhn nwacsnwacs ac karuhnganwacng mahno in afyucfi in fal uh ngihstreuyuck ke olwelah uh ac enenuh in kaksre kom sulaclah kain in nuknuk ma enenuh in nukumyuck uh. Mempucr ke Alu ma eis tari mwe sang muhtahl uh nukum karmacn uh tuh in sie mwe ahkacsmak ke olwelah muhtahl elos oraclah nuh sin Leum ac oacyacpac in sie mwe karihngihnyuck liki mwe sruhf ac ma koluk. Nukumyac an ac fahkwack insiom lah kom eiskomyang in fahsr tukun Mwet Lahngo” (First Presidency letter, 10 Oct. 1988).

5. Kais sie mwet enenuh in ahkollah nuh ke alu in sifacna ac in muhtahl.

Ke tempuhl, met liki, pacl sacn, ac tukun mukwikwi in alu an, oasr pacl wowo luhn sie mwet in motko ac kaluckyang nuh sin Pahpah Lucng ac Jisus Kraist. Mwet nuh kwewa oasr kihsensiyuck la ma enenuh top, mwe utuck la ma enenuh in ahkmuhlahlahyeyuck, elyah la ma enenuh in ahkwoyeyuck. Puhs engankinyen tempuhl oacna sie acn in som liki facluh ac in sramsram nuh sin Pahpah Lucng. Puhs top, mislac, ac engan konweyuckyak lun tempuhl.

Prestuhn Ezra Taft Benson el fahk: “Tempuhl uh acn in eis fwackyuck luhn kais sie mwet. Pacl nga toasr ke sie elyah kuh sie ma upac, nga som nuh lohmsin Leum ke sie pruhe oan insiyuck in eis top kac. Top inge ac tuhkuh ke inkacnek na kahlwem ac wacngihn tahfonglac kac” (“What I Hope You Will Teach Your Children about the Temple,” *Ensign*, Aug. 1985, 8).

Ahkkahlwemye lah lun tempuhl, kuht kuh in sang en mwet ma oasr enenuh yohk srihpac la nuh sin mwet ma som nuh ke tempuhl an in muh kuh in sang luhlahlfongi lalos ac pruhe in ahollah mwet inge.

#### AHKOLAH ELYAH NUH KE MUHTWACTA SE MET NUH IN TEMPUHL

Ma in etweyuck tahklac inge ac kaksruh kais sie mwet in oraclah ahkollah nuh kwewa ma enenweyuck nuh ke muhtwacta se met nuh ke tempuhl ac liye lah pwacye muhtwacta se inge mwe ahkwoye kom. Sramsramkihnuh sin mwet ke kuhlahs ma in etweyuck ma ac orek-makihnyuck nuh ke ohiyac lalos uh.

1. *Pwepuh in Lwelah nuh Tempuhl*. Eis sie pwepuh in lwelah nuh tempuhl. Ahklohyac us pwepuh in lwelah lom an in wi kom nuh tempuhl, srihpen elos na ma srack wo pwepuh in lwelah la an kuh in utyak. Ke kom moul nwacsnwacs uh, pwepuh in lwelah sacn ac lwelah nuh sum in utyak nuh ke kuhtwena tempuhl luhn Alu uh

pacl nuh kwewa kom luhngse uh ke yac luo tohkoh an. In ahksa-sucye pwepuh in lwelah nuh tempuhl lom an, enenuh in orek sie lohngohk nuh sum sin sie mwet ke pisaprik lom an kuh prestuhn luhn pracns lom an ac sie mwet ke prestuhnsi ke stek lom an kuh prestuhn ke misin.

2. *Plwacni ac oraclah pacl luhn muhtwacta.* Met liki kom som nuh ke tempuhl in eis mwe sang muhtahl kuh akwuck nuhke sil, pahngon tempuhl in oraclah sie pacl an. Konwacack pacl kom enenuh in sun tempuhl an, lusackah pacl kom enenuh in muhta an, ac meac kom enenuh in us an. Siyuck kahsrüh luhn lweng fin enenuh.
3. *Plwacn luhn som an.* Fin kom muhta loeslac liki tempuhl, kom enenuh in nuhnkuh ke ma tahklac inge:
  - Oraclah forfor, acn in muhta, ac mongo in tahkihnyucklac met liki pacl. Ac kuh in ma ke ahkolah lom pa in som wi sie u fin kuh.
  - Fin enenuh, oraclah plwacn met liki in ekuhllah mani lom an nuh ke acn se tempuhl sacn an we an.
  - Us mani fal in moli mwe enenuh nuh kwewa. Kom ac enenuh in molwelah kuhtuh pac karmacn, renti nuknuk nuh in tempuhl, ac moli acn in muhta ac forfor. (Fahk in etweyuck lah nuknuk in rentiyuck uh puhs na tempuhl wacngihn kac. Prestuhnsi Se Met kwacfe mempucr nuh kwewa in molwelah nuknuk nuh in tempuhl lalos sifacna.)
4. *Nuknuk.* Plwacniac kom in nuknuk oacna ke pacl kom som nuh ke toeni ke Sacnri uh. Muhtwacn uh tiac enenuh in nukum tuhrais nuh ke tempuhl.
5. *Mwet in pwenyuck se.* Elos nuh kwewa ma som nuh ke tempuhl pacl se emet kuh in eis sie mwet in pwenyuck in weluhlos. Kuh in sie sin sucu lal kuh kawuck mukul se fin el mukul se kuh muhtwacn se fin muhtwacn se pa el tuh in ma tuhfhana fohlohk tempuhl me an, kuh sie mwet orekma tempuhl an kuh in kahsrüh. Mwet orekma tempuhl uh ac usot kolyuck na kuhlzacng pacl nuh kwewa.
6. *Orekma ke Sil.* Fin kom plwacni in oruh orekma ke sil luhn mwet mahtuh lom ma misac ah, kom enenuh in us ma sihmlac nwekyucklac ke u in sucu in wi kom nuh ke tempuhl. Fin kom ac mukul kuh muhtwacn kiom an ac sil kuh fin ac oasr tuhlihki nuhtum in sil nuh sum, kom enenuh in us ma sihmlac ke u in sucu lom sifacna an. Kom fin ac macruhtiyuck, kom ac enenuh in oruh fal nuhke masap ke acn sacn ac us sie pwepuh in macruht srack sasuc an in wi kom. Riti ahkwoyac (*Members' Guide to Temple and Family History Work*) (34697) in eis kuhtuh pac ma in etweyuck kahlwem lah ac orek fuhkah in sang akwuck lun tempuhl nuh sin kwewana

mwet moul ac mwet misac. Kom kuh pac in ohsun nuh sin mwet liyacacng ma sihmlac ke tempuhl se kom plwacni in muhtwacta kac an.

7. *Liyacacng Tuhlihk.* Fin tuhlihk uh tuhkuh nuh ke tempuhl in wi ke sie alu in sil, elos ac liyeyuckyang lun tempuhl ke acn luhn mwet fuhsr ah nekena pac laltahl in wi komtacl ke rum in sil ac. Nuknuk fasrfasr nuh ke mukwikwi in alu an ac fah ituckyang nuh sin tuhlihk an. Tukun mukwikwi in alu ke sil an sahflah uh, elos ac fohlohk nuh ke acn luhn tuhlihk fuhsr ah in sanwekowos. Wacngihn karihngihnyuck nuh sin tuhlihk ma ac tiac wi sil ke tempuhl an.

8. *Karmacn ke Tempuhl.* Kom ac enenuh in molwelah sie kuh luo pacr in karmacn ke tempuhl an met liki kom utyak nuh ke tempuhl an. Nimet nokomwacng met liki kom som nuh ke tempuhl an. Tukun eis mwe sang muhtahl lom ac ke kom falkihn muh kom konwacack sais fal lom ac ma sang oraclah an, kom kuh in molwelah kuhtuh pac pacr in karmacn an in weacng. Kuhtuh mwet uh luhngse ohlah pacr in karmacn se laltahl emet uh in liye na pwacye lah ac fal na met liki elos sulpac moli kuhtuh pac. Karmacn ke tempuhl uh oreklac sin Alu uh na ac kuh in moul ke acn in kihtakat luhn Alu uh.

9. *Nuknuk nuh in Tempuhl.* Prestuhnsi Se Met kwacfe mempucr uh in molwelah ac orekmakihn nuknuk nuh ke tempuhl laltahl sifacna uh. Ke kutuh tempuhl uh kuh in rentiyuck nuknuk ke tempuhl uh ke molo na srihsrihk se, tuhsruhk ac wo mempucr in oasr la ac karanganwacng nuknuk nuh ke tempuhl laltahl sifacna. Pisap kuh prestuhn luhn pracns kuh in fahk nuh selos lah nuknuk inge kuh in sukokyak yac.

Muhtwacn uh kuh in nukum nuknuk in macruht laltahl an nuh ke macruht lun tempuhl laltahl an, tuhsruhk nuknuk sacn enenuh in fasrfasr, loes paho, in nwacsnwacs ke atac an ac ke ma oraclah an, wacngihn acn ahtlah kac, ac wacngihn nahweyuck upac kac.

*“Mukwikwi in alu uh ma tahkihnyucklac sin sie Pahpah Lucng na lahlmwetmwet ... nga ac kom in muh tiac kuf in wi eis opi luhn moul ma pahtpaht yurin God ke tohkohsrahi luhn celestial” (Prestuhn Harold B. Lee).*

#### SAHFLAH

Akacsruhi puhla lom ke muhtahliyacn orekma ke tempuhl. Ahkkahlwemye engan lom in liye mempucr ke kuhlahs uh ahkolah in utyak nuh ke tempuhl uh.

Suli sie mwet an in kaliyac ke pruhe.

Tukun lesin se inge, mwet wi kuhlahs ac mwet luti an enenuh in tukweni som nuh ke tempuhl ke acn ma kuh an.





## SIKALWENI IN ENGANKIHN MWE INSEWOWO KE SOM NUH IN TEMPUHL UH

*Tuh liye, Nga eis  
tari lohm se inge,  
ac ek fah oasr inge;  
ac nga fah  
fahkyuckyak nuh  
sin mwet luhk ke  
pahkotwen lun  
lohm se inge (liye  
D&C 110:7).*

### SRIHPAC

In lohngohk ke muhtwacta emet luhn mempucr ke kuhlals nuh tempuhl ac kaksrelos ahkolah in engankihn tempuhl ke lusen moul lalos.

### AHKOLAH

1. Ahkolah in oruh lesin se inge in sie pacl in akacsruhi. Puhs sin mempucr ke kuhlals an ac ke sramsramkihn muhtwacta se emet laltahl nuh in tempuhl an.
2. Srihsrngiac sie mempucr ke kuhlals an in ahkolah in riti Doctrine and Covenants 110:1–10 ac akacsruhi puhla lal kac an.
3. Srihsrngiac sie mempucr ke kuhlals an in sruhmuhn in fototo sramsram kac! Elijah ma fwack ke *Ahkolah in Utyak nuh ke Tempuhl Muhtahl*, an ke sra puk 23–24.
4. Ahkolah in topuk kihsensiyuck ma ac sahp siyuckyuck ke muhtwacta se emet nuh ke tempuhl an, tuhsruhkimet sramsramkihn kihsensiyuck kuh mwe ahkuhtweyac ma enenuh in fihliyucki in sramsramkihnyuck lun tempuhl sifacna an. Fin oasr kihsensiyuck ma enenuh na in top lun tempuhl muhkwenah, kwacfe kais sie in plwacni sie pac muhtwacta an nuh ke tempuhl.

### LUTIYACN LESIN

Suli sie mwet an in ikacslah ke pruhe.

Siyuck sin mwet ke kuhlals an lah oacna oasr kuhtwena kihsensiyuck lalos. Orekmakihn pacl fal in topuk kihsensiyuck an ke kuhiyom kwewa ac ke kolyuck sin Nguhn luhn Leum. Esam lah kuhtuh ohiyac ma orek ke tempuhl uh tiac enenuh in sramsramkihnyuck lihkihn tempuhl.

### SRUOKYACNA SIE LUHNGSE KE OREKMA KE TEMPUHL

- Kom puhla fuhkah pacl se kom oasr lun tempuhl ah?

Ahkuhtweyac lah orekma ke tempuhl uh ac use na use mwe insewo nuh ke moul lalos suc som pacl nuh kwewa nuh ke tempuhl uh. Fahk nuh sin mempucr ke kuhlals an lah ke srack esamyuck oruh

laltahl lun tempuhl ah sahp elos ac ke suhmuhslah puhla laltahl kac an lun johrnuhl nahtuhltahl an. Ahkacsmakuhnuhlos lah finne elos kuh in suhmuhslah puhla laltahl an, elos tiac enenuh in sihmihs kuhtwena ma ke tempuhl, suc ma tiac enenuh in sramsramkihnyuck lihkihn tempuhl.

- Meac kom kuh in oruh in srukyacna sie luhngse ke orekma ke tempuhl ke lusen moul lom uh?

Suhmuhslah nuhnak luhn mempucr ke kuhlals an ke port an. Kom ac ke pac sramsram ke nuhnak tahklac inge:

1. Motko oruh ke tempuhl ah ke kais sie lwen.

Ahkkahlwemye lah kuhtuh mwet uh puhs pacl wowo la in som muhtwacta ke tempuhl liki kuhtuh. Tuhsruhke fin kuht som nuh ke tempuhl tari ac puhla Nguhn se inge we, kuht enenuh in eis pacl wowo kais sie lwen in motko mukwikwi in alu tempuhl ac nuhnkuh ke olwelah ma kuht oraclah ah. Ma inge kuht fin oruh na ac pahtok kuht kais sie lwen in nuhnak ac mukwikwi ke ohiyac wo kuhtuh uh.

Kuht ac tiac kuh in esam ma nuh kwewa ke tempuhl ah, tuhsruhke kuht enenuh in srihke in esam ma kuht kuh uh tukun kais sie muhtwacta. Kuht enenuh pac in lutlut ke ma suhmuhslah ac kals luhn mwet pahluh ke tempuhl. Kuhtuh sin ma inge pa lutiyuck ke mwe luti se inge.

Kom ac kuh in sap sie mempucr ke kuhlals an in sruhmuhn in foto-to fahk se inge, ma konweyuckyak ke sra puk 10 ke *Ahkolah in Utyak nuh ke Tempuhl Muhtahl*:

“Mukwikwi in alu ke tempuhl uh ac tiac arlacna kahlwem ke muhtwacta se emet uh. Ac kuh in kuhtuh na ip kac an pa kahlwem uh. Fohlohk na fohlohk na fohlohk. Fohlohk in lutlut kac. Ma kom elyah kac kuh ma ahkfohs kuh ma tiac kahlwem ac fah etwacalah....

“Ke oasr pacl wowo lom in wi sie sesin lun mwe sang muhtahl lun tempuhl kuh in wi mwet loh ke sie sil, motko in loal kalmacn ma kom liye orek ye motom an. Ac ke kuhtuh lwen tukun muhtwacta lom an srukyac ma inge in nuhnak lom an; ke mislac ac pruhe sifilpac liye ma inge na kom ac konwacack lah kahlwem lom an ac yohkwaclihke.

“Sie ma yohk srihpac ke ma kuht liyaclah lun tempuhl uh pa ac use kahlwem na yohk ke srihpac luhn God ma kuhpahsr nuh ke facluh se inge. Ke kuht utyak tari nuh in tempuhl uh (ac kuht kuh in fohlohk ac sulpac lohng) ma sikyak ke moul ma fal nuh ke plwacn luhn God. Kuht kuh in liye lah piac kapsreyacsr nuh ke plwacn se ingacn ac kuht kuh in sa na liyacack pacl se kuht kuhflah liki ma pwacye uh.”

2. Esam lah srihpac yohk se ke alu lun tempuhl nuh kwewa pa Mwet Lahngo, Jisus Kraist.

Ma suhmuhslah uh luti lah srihpac yohk se in muhsahi tempuhl uh pa in muh oasr sie acn Wen nuhtin Mwet in fahkuhlwack sifacna nuh sin mwet lal (liye D&C 109:5). Akucl ac alu ke tempuhl uh kah-srekuht in furokkuht nuh sin Mwet Lahngo.

Ahkkahlwemye lah Mwet Lahngo el fahkuhlwack sifacna lun tempuhl Kirtland ah. El sikyang nuh sel Joseph Smith ac Oliver Cowdery in eis tempuhl in sie lohm Sel. Muhtwacta se inge sihmlac ke Doctrine and Covenants 110:1–10. Siyuck mempucr se ke kuhlahs ma srihsrngiyucki an in riti ac ahkuhtweyac ke mwe rit se inge.

- Meac mwe insewowo ma Mwet Lahngo el olwelah nuh selos suc muhsahi ac utyak nuh in tempuhl uh?

#### **LUN TEMPUHL, SUCU UH SILI NUH SIE NETOK MA PAHTPAHT**

Siyuck mempucr ke kuhlahs an in riti Malakai 4:5–6.

Siyuck mempucr se ke kuhlahs ma srihsrngiyucki an in sruhmuhn in fototo ma in etweyuck kacel Elijah konweyuckyak ke *Ahkolah in Utyak nuh ke Tempuhl Muhtahl*, sra puk 23–24.

Ahkkahlwemye lah Elijah el fohlohkoh ac fohlohkohnwack ki luhn pristut ma lwelah sucu uh in sili nuh sie lun tempuhl netok ma pahtpaht.

Sang mempucr ke kuhlahs an in sulpac liye Doctrine and Covenants 110:13–16. Na siyuck sie mempucr ke kuhlahs an in riti fahk tahklac inge, oasr ke sra puk 28 ke *Ahkolah in Utyak nuh ke Tempuhl Muhtahl*:

“Tukun na lwen sac me, April 3, 1836, insiacn tuhlihk uh muhtwacwacack in furokyuck nuh sin pahpah tuhmwaclos. Pacl sacn fahsruh akwuck ingacn tiac ma na nuh ke kihtin pacl, tuhsruhk ma na netok. Kuh se nuh ke sil uh oasr sesr. Wacngihn kuh ma ituck in yohk liki srihpac la uh. Kuh se ingacn sang kalmeyac an ac ma ac fahlac na netok se nuh ke akwuck nuh kwewa ma orek ke kuh pwacye nuh sin kwewana mwet moul ac mwet misac.”

Mwet Lahngo el ahkuhtweyac kuh se luhn sil uh pacl se El sramsram nuh sel Peter Mwet Sap Lal, oacna ke sihmlac ke Mathew 16:19. Sap mempucr ke kuhlahs an in riti fuhs se inge.

Ahkkahlwemye lah ki pacna inge pa sruokyuck sin mwet pahluh ac Prestuhn luhn Alu uh. Kuh in sil muhtahl sac oasr ke Alu uh mihse-enge. Wacngihn ma motkoeyuck in muhtahl liki ke liye lalos suc etuh ke yohk srihpaciyacn kuh se inge. Wacngihn ma taranyuck yohk liki ke orekmakihnyac sin sie pacna mwet uh. Oasr na mwet ekahsr ac

kuh ma ituckyang lusen pacl se in sruok kuh luhn sil se inge fin facluh—ke kais sie tempuhl pa mukul ma ituckyang kuh in sil se inge nuh se uh. Wacngihn sie kuh in eis sahyacn in eis sin mwet pahluh, mwet liyactwen, ac mwet eis fwackyuck ac prestuhn luhn Alu luhn Jisus Kraist luhn Mwet Luhlahlfongi Lal ke Lwen-Sahflah kuh sin mwet el sang kuh nuh se in sang nuh sin mwet sahyac” (*Ahkolah in Utyak nuh ke Tempuhl Muhtahl*, 24, 26).

Ahkkahlwemye lah akwuck in sil uh pa in siliyac sie mukul tuhma ac muhtwacn kiac nuh sie ac siliyac pahpah ac ninac nuh sin tuhlihk. Ke pahpah se ac ninac se sili tari lun tempuhl, tuhlihk isuslac nuh selos an ac isuslac nuh ke olwelah ke sil luhn pahpah ac ninac kiaclos ac tiac enenuh in sil nuh sin pahpah ac ninac kiaclos an.

- Kom nuhnkuh tuh in sili nuh sie lun tempuhl ac mokle fuhkah nuhna ac mukwikwi luhn sie sucu in lwen nuh kwewa uh?
- Mwe insewowo fuhkah kom motko muh ac tuhkuh nuh sin sie sucu ke srihpen sili lalos lun tempuhl uh?

Prestuhn Gordon B. Hinckley el fahk: “Nuh oasr sie mukul ma luhngse na pwacye sie muhtwacn, kuh sie muhtwacn ma luhngse na pwacye sie mukul, ma tiacna pruhe tuh toeni lalos an in fahfahlac na tukun misac lalos uh? Yac oasr sie tuhlihk puckpucki sin pahpah ac ninac se ma tiac sano mwe ahkpwacyeye se ma muh tuhlihk suc elos luhngse fah sifil ma nahtuhlos ke facluh se tok uh? Yac oasr sie kuh in luhlahlfongi ke moul ma pahtpaht ac suhlahlfongi lah God inkuhsrao el ac kuh in sang nuh sin tuhlihk mukul ac muhtwacn nahtuhl sie ohiyacn moul ma sacohk emet, luhngse se ma yohk emet kalmeyac ma ahkkahlwemyeyuck ke kuhpahsr luhn sucu uh? M-moh, enenuh in oasr motkoeyac lah kuhpahsr luhn sucu uh ac fah fahlacna tukin misac uh. Insiacn mwet uh sano kuh se ma muh kuhpahsr luhn sucu uh ac fahlacna tukun misac uh ngwe, ac God inkuhsrao el fahkwack ke sie inkacnek ma kuht kuh in etuh lah ma se inge ac sikyak. Akwuck muhtahl ke lohmi sin Leum oruh ma inge kuh” (“Why These Temples?” *Temples of The Church of Jesus Christ of Latter-day Saints* [1988], 4).

#### TEMPUHL UH USE NUH SESR PACL WOWO IN KUHlwacNSUHPUH ELOS SUC MA MISAC

Sap mempucr ke kuhlahs an in riti Obadiah 1:21.

Mwet pahluh Joseph Smith el ahkuhtweyac lah mempucr ke Alu uh ac kuh in eklac mwet lahngo fin finohl Zion uh fuhkah:

“Tuhsruhki [Mwet Luhlahlfongi uh] in eklac mwet lahngo fin finohl Zion fuhkah? In muhsahelah tempuhl lalos, tulohkohnwack nien

*“Orekma in ahol mwet se inge ma in orek lun tempuhl lasr uh enenuh in tuhtahflah na ke nguhn se pacna ma in tiac nuhnkuh kac sifacna in kih-sackuhnlah ac lah-fuhkuhnlah ma kahlwem ke moul se Lal Mwet Luti ac” (Prestuhn Thomas S. Monson).*

pacptais lalos, ac in som ac eis akwuck nuh kwewa, pacptais, ahkkweyelah, ahknwacsnwacs, mosrwelah, akmuhsra ac kuh luhn sil fin sifaclos, in ahollah mwet somlah lalos nuh kwewa ma misac, ac molweloslac elos in muh kuh in wi moulyak se met ac in eis moul ma pahtpaht yurin God in weluhlos nuh ke tron luhn engan; ac akwuck inge pa sein soko ma kapsreni insiacn pahpah nuh sin tuhlihk, ac tuhlihk nuh sin pahpah, suc ahkpwacyeyelah misin lal Elijah” (*History of the Church*, 6:184).

Ahkkahlwemye lah in sie ip ke plwacn in molwelah Lal, Pahpah tuhmasr Inkuhsrao el ahkollah inkacnek se nuh selos suc misac tiacna eis akwuck in molwelah ke wasasuc uh in eis akwuck inge. Oasr pacl wo-wo luhn mwet ke facl luhn nguhn ah in wi lohng ke wasasuc uh. Elos kuh in lutlut we, tuhsruhk elos tiac kuh in sifacna eis akwuck ke wasasuc uh we. Leum el sapkihn nuh sesr in oruh akwuck inge lun tempuhl muhtahl. Kuht enenuh in sang kuhiyacsr in oruh orekma ke sramsram mahtuh ke sucu uh kuht in muh kuh in eis akwuck aholah mwet mahtuh lasr sifacna.

Akwuck luhn mwet misac ma orek lun tempuhl pa pacptais, ahkkweyelah, akmuhsra luhn pristut, eis mwe sang muhtahl, ac sil luhn mukul tuhma nuh sin muhtwacn kiac ac pahpah ac ninac nuh sin tuhlihk.

Kuht enenuh in fohlohk nuh ke tempuhl pacl nuh kwewa ma kuh an kuht in muh kuhlhwacnsuhpuh elos suc misac tari in oruh akwuck lalos uh. Kuht ac ahkinsewowoye moul lalos suc kuht kuhlhwacnsuhpuh uh ac ahkinsewowoye pac moul lasr sifacna uh. Mwe ahkuhtweyacyac nuh ke oreycn orekma ke sramsram mahtuh ke sucu ac oruh akwuck luhn mwet somlah met lasr uh ahkuhtweyucki oasr ke *Sie Puk in Kol Nuhtin Mempucr nuh ke Tempuhl ac Orekma ke Sramsram Mahtuh ke Sucu* (34697).

Prestuhn Thomas S. Monson el fahk:

“Sie srui ke mwe sang muhtahl ke tempuhl ac akwuck luhn sil uh ac ahkfototoyelah inmahsrlon mempucr ke sucu lasr nuh sie ac kais sie mempucr ke sucu ac oasr kena la in oraclah mwe insewowo pacna inge in oasr nuh sin mwet sacohk lasr ma misac tari...”

“Orekma in ahol mwet se inge ma in orek lun tempuhl lasr uh enenuh in tuhtahflah na ke nguhn se pacna ma in tiac nuhnkuh kac sifacna in kih-sackuhnlah ac lah-fuhkuhnlah ma kahlwem ke moul se lal Mwet Luti ac. Ke kuht esamuhl uh, ac fihsracsr nuh sesr in oruh ip lasr kais sie nuh ke orekma luhn moul se inge. Kais sie pacl kuht ngwetwacng nuh ke sie sin lohnm muhtahl inge, lwelah kuht in ahkacsma-kihnyeyuck ke pacl wowo netok ma pahtpaht ma konweyuckyak loac uh, tiac nuh sesr sifacna, tuhsruhk nuh sin mwet misac lasr” (*Pathways to Perfection* [1973], 206–7).

### SAHFLAH

Ahkuhtweyac lah som nuh ke tempuhl uh use pacl wo nuh sesr in kuhlwacnsuhpuh mwet sahyac ac in eis etwacack ke nguhn in yoh-kwaclihk. Akacsruhi ke fahk tahklac inge:

“Wacngihn sie orekma in mwe karihngihnyuck yohk nuh ke Alu se inge liki orekma ke tempuhl ac sukyacn tahk sucu uh suc kaksreacng. Wacngihn orekma ma yohk ahknwacsnwacsyeyac ke nguhn. Wacngihn orekma kuht oruh ma use nuh sesr kuh luhlaph. Wacngihn orekma enenuh sie masap fuhlwact luhn suwohswohs....

“Fin kuht ac eis fwackyuck ke orekma nuh ke akwuck ke tempuhl, fin kuht ac utyak nuh ke olwelah lasr tiac wetok kuh taltal koluk, Leum el ac karihngihnkuhtyang. Kuht ac eis kolyuck fal nuh ke kwacfeyuck luhn mouh uh....

“Na pa tuhkuh nuh ke tempuhl—tuhkuh ac eis mwe insewowo lom. Sie orekma muhtahl” (*Ahkolah in Utyak nuh ke Tempuhl Muhtahl*, 37).

Ahksahfyelah lesin an in akacsruhi luhlahlfongi la. Kwacfe mempucr ke kuhlals an in nuh fohlohk na nuh ke tempuhl elos in muh kuh in lutiyuck sin Nguhn luhn Leum.

Kom kuh in fahk lah mempucr ke kuhlals an kuh in eis ke acn in kihtaclah luhn Alu uh ac liye lohm ah kahset in liyeyuck se inge. *Mountain of the Lord* (53300). Mwe liyeyuck ke lusen mihnit 73 se inge sruhmuhn sramsram ke muhsahiyacn tempuhl Salt Lake ah.

Suli sie mwet an in kaliyac ke pruhe.



ALU LUHN  
JISUS KRAIST  
LUHN MWET  
LUHLAHLFONGI LAL  
KE LWEN-SAHFLAH

KOSRAEAN



4 02368 54868 0

36854 868